

東  
華  
續  
錄

東華續錄

咸豐八十九

臣王先謙敬編

臣陶濬宣恭校

冬十月丁酉朔享太廟○諭內閣駱秉章奏賊營投回匪犯免罪畱營差遣等語湖南民人周學韓等被賊擄脅見既自拔來歸著准其免死畱營效力至賊營被脅民人非甘心從逆者可比曾經疊降諭旨許其投誠自效惟逆賊於被擄難民往往偏令蓄髮並有頭面刺字以杜其投誠者該民人等無以自明遂不能不瀝迹其中以冀偷生旦夕實堪憐憫此次該逆竄楚經駱秉章出示曉諭凡蓄髮刺字匪犯但能棄械投誠卽給與免死護票資遣歸籍各省難民逃出領票者不下二萬餘人辦理實屬妥善因思用兵各省良民似此被脅入夥者諒必不少著各路統兵大臣及各

督撫剴切示諭此等難民雖被脅蓄髮刺字果能逃出賊營卽  
給予免死護票資遣回籍其原籍督撫並著嚴飭地方文武不得  
縱令兵練妄加殺害其有未領護票私自逃歸者但係良民一律  
免其查辦惟向係地痞惡棍及曾充鄉勇投入賊營敗退潛回者  
仍由地方官查明懲辦以示區分而昭矜恤將此通諭知之○駱  
秉章奏石逆敗竄粵西畏楚軍速至過全州時不敢偪攻城垣竄  
踞興安靈川兩縣於嚴關大溶江一帶連紮營壘以拒援軍其僞  
國宗聶姓一股勾結粵西恭灌各賊已先由興安靈川撲廣西省  
城當檄催蕭啟江由全州趨興安收復縣城逆首石達開設卡塘  
埠營百子鋪一帶大股屯踞大溶江八月十九日蕭啟江派兵分  
中左右三路前進敗賊於塘埠營追至百子鋪焚賊巢十一所沿  
途追殺斃賊無算惟大溶江對岸之賊尙與官軍相持各營並進

奮勇衝殺賊勢不支紛紛奔潰是役往返百餘里出賊不意竟獲全勝大溶江之賊既敗塘埠百子鋪之賊亦走石逆時在靈川遂焚所掠穀米向西路遁走二十三日由靈川甘石鋪竄義甯縣龍勝廳一帶二十五日蕭啟江拔營趨桂林桂林撲城之賊亦經蕭榮芳擊敗東北聞已無賊惟西南路之賊尙屯踞如故二十八日劉長佑拔營進至全州探報石逆竄至永福並聞郴州之賊出巢應之平樂所屬及廣西各股賊匪均有句結合夥之意石逆去畱蹤迹雖尙未定然義甯永福可南竄郴州北竄黔邊自應豫爲防範臣已飛飭總兵田興恕由東安新甯武岡綏甯前赴靖州取道截剿探悉粵西融縣懷遠一帶尙無外來賊蹤惟貴州之賊已有由梅寨至柳州者或係邀約石逆入黔亦未可知黔之北境卽蜀之南境尤當豫防竄突臣當於楚黔之交設法截剿遏其竄蜀之

路斷不敢稍涉推諉 上諭軍機大臣等石逆狡悍異常既經湖南廣西官軍擊敗難保不勾引另股匪徒竄往他處所有廣東江西湖南三省前已有旨諭令各飭沿邊文武嚴密堵剿並令蕭啟江帶兵出境窮追諒可無虞竄擾惟該逆蹤迹靡常欲竄蜀疆必取道黔省此時田興恕尚未回黔著駱秉章卽飭該署鎮詳加偵探如該逆竄往黔省務當實力截回毋任闖入劉長佑一軍見經進至全州並著探明賊蹤前往追剿必將石逆殲除以杜後患昨據有鳳奏滇匪竄至川省猝不及防以致筠連等三縣失守見在調兵出剿請畱藩司祥奎在川辦理諸務等語已有旨令祥奎毋庸署理廣西巡撫矣著曹澍鍾俟廣西軍務漸平賊氛已遠堪以離省卽行奏聞當令派員暫署巡撫印務以便該撫回川經理喪事也將此由六百里各諭令知之○諭本日據瑛棨奏逆捻竄擾

商永及睢州一帶派兵分投截堵各等語逆捻孫葵心等分股竄擾商邱柘城圍撲睢州約二萬餘人杞縣已見賊蹤距省不過百里情形緊急經該撫咨照關保調令承惠王鳳祥等統率馬步繞出賊前力顧西北兩面並由省調派馬步練勇由崇安營帶出省馳赴杞睢一帶迎頭堵截所籌尙屬周妥惟賊勢猖獗奔突靡定關保所部兵勇爲數無多柘城又在鹿邑西北在在皆可繞越瑛榮業經咨照傅振邦等分路兜剿卽著傅振邦迅派馬步兵勇會同參將承惠等軍探賊所向迎頭截擊力固北路藩籬毋令賊蹤繞越瑛榮有地方之責並著嚴飭文武集團守禦以期偪賊回巢再行協力剿洗毋稍延誤將此由六百里各諭令知之○諭近聞勝保以酒色行樂不顧生民塗炭並奏報不實致剿辦皖匪日久無功著和春何桂清派員密查據實具奏勝保係安徽一路督兵

大臣一時頗難更易著和春何桂清於江南江北帶兵大員中擇其可以勝任者酌保一員候朕簡用將此由六百里諭令知之○駱秉章奏查楚省赴援廣西之蕭啟江劉長佑諸軍已於八月二十八日九月初九日前後馳抵桂林賊聞楚軍大至悉數由南路遁竄城圍立解竄撲廣西省城者僞石國宗一股至石達開聞尙踞義甯永福一帶廣西學臣李載熙前奏賊匪遁至東安與其黨謀所向欲暫取粵西以爲後圖不得則竄踞南甯爲再出計疊據拏獲奸細所供大略相同而曹澍鍾來咨又稱拏獲奸細賊意欲回竄江西彼此互異而於石逆蹤迹皆未能確切指明亦未言援軍急宜專注石逆或以石逆尙可緩圖而桂林之圍必須急解耳所不可解者李載熙原奏係八月二十七日拜發蕭啟江蕭榮芳均於二十八日抵省賊已解圍李載熙近在一城何以先一日拜

指之時竟無聞見乃以省城危急外援難到情形入告致煩聖  
慮僞后國宗一股人數雖多然屢經擊敗似亦無甚伎倆蔣益  
澧已於八月初二日馳抵省城所部蔣澤春等勇方自柳州調回布  
置城守已屬有備無恐且逆首是后達開非僞后國宗援軍討賊  
自應先其所急蕭啟江全軍旣已先赴桂林以援省城劉長佑全  
軍見屯靈川擬先剿義甯以除巨憝杜其竄往黔蜀之路至蔣益  
澧少年氣盛閱歷甚少自以身經百戰頗習兵事每論用兵事宜  
於僚屬多所凌忽臣早經慮及然廣西一省除該員所部水陸各  
勇外實別無兵勇可以調撥臣謹據實覆陳伏乞聖鑒報聞○  
戊戌諭內閣張亮基等奏克復嵩明州城攻破賊寨一摺雲南嵩  
明州回匪孫漢鼎等占踞州城招集匪黨肆行焚掠本年五月內  
經張亮基派都司何自清帶兵練千餘名馳往剿辦連獲勝仗斃



匪千餘並斃首匪孫漢鼎及著名兇匪十數人至七月間嵩明州知州春慶約會城內漢民爲內應縱火開城兵練一擁而入賊眾驚竄追殺五六百人遂將州城克復知州春慶雖隨同克復城池而前次回民入城未能分別良莠實屬辦理失宜著革職暫行畱任並責令隨同攻剿肅清餘孽所有出力員弁兵練並捐貲紳民人等著准其擇尤保奏候朕施恩○己亥諭軍機大臣等彭蘊章等奏豫籌天津海防仍請宣洩河水一摺據稱上年屢經議洩南北運河等水今查南運河水應將滄州捷地隄淤河挑通導之入海再於天津城西開引河一道令入南窪則南運河之水可減北運河水應挑通楊村筐兒港令由東淀入海則北運河之水可減大小西河水應挑濬天津城東減水河使之東流則西河之水可減再於馬家口以下開道引河引河入南窪並開濬白塘口則海

河之水可減以上各口或修理舊牐或建築土壩無事則閉有事則啟來源分則下流易淺於守禦之策較有把握等語著僧格林沁恆福查照該大臣等所議派委委員分投履勘儘將各牐壩修建實能減淺河水有裨守禦卽著乘此冬令水涸之時趕緊籌辦此項工程係就原有河道挑挖工費自不甚鉅或作正開銷或由官紳捐辦並著僧格林沁等酌量奏明辦理原摺著鈔給閱看將此諭令知之○左都御史綿森等奏遵旨覆覈朝審人犯應由緩改實之浙江絞犯張汰聰應照原擬仍入緩決辦理其呂瀛儀一案請飭浙江巡撫再行研鞫得旨此事朕兩次諭旨想該堂官等並未看明初云悉心定擬繼云覆擬具奏試問悉心者何定擬者何不過順水行舟得推則推盈廷若皆如斯之卿貳朕圖治何所賴焉著派惠親王載垣專會同都察院堂官再爲悉心定擬覆覈

具奏○庚子諭軍機大臣等和春奏揚防官軍擊退京竄悍賊該逆大股西潰圍撲六合撥兵援剿一摺逆匪勾結捻匪由司徒廟竄至瓦窑埠沿途鈔掠直逼揚州郡城經留守總兵馬得昭派兵迎擊賊眾奔潰於十七日糾眾西竄由小路繞道儀徵陳板橋距六合大營止十餘里分股攻陷紅山窑營盤該大臣已派記名總兵朱承先等渡江策應並飛咨袁甲三飭副將張威邦由清淮回至揚城抽撥兵勇星夜前赴六合應援並飭水師參將李新明分撥艇船五隻駛泊段腰口江面堵其南竄布置尙爲周密紅山窑係李若珠大營後路一經失陷餉道不通情形萬分危急覓在朱承先張威邦各軍業已馳抵瓜埠著卽嚴飭各軍奮力進攻前後夾擊先將紅山窑營盤趕緊攻克以通餉道而全大局所有失守營盤各員著卽查明分別參辦將此由六百里諭令知之○諭御

史林之望奏懷遠縣民人胡文忠呈遞書函以死迫伊代奏一摺該民人全家被難賣女來京以地方大冤未伸欲行叩闕並呈遞書函經該御史勸阻旋在會館自縊據該民人書函內稱勝保以酒色行樂不顧生民塗炭張元瀧投誠復叛李兆受滋擾滁來翁同書將降匪之知縣王啟秀保升知府通匪之懷遠主簿顧長源擢用知縣道員黃元吉不借懷遠縣餉銀以致該縣失守又縱兵搶掠設卡剝民各等語勝保翁同書剿辦皖匪日久無功地方糜爛已極胡文忠所指各情未必無因著和春何桂清遴派妥員前往江北密行訪查如勝保耽於酒色奏報不實翁同書保舉匪人卽著據實具奏勝保係安徽一路統兵大臣一時頗難更易著和春何桂清於江南江北帶兵大員擇其堪以勝任者酌保一員候朕簡用原摺單並胡文忠信函均著鈔給閱看將此由六百里各

諭令知之○諭瑛榮奏擒匪竄擾蘭儀省城喫緊請暫畱黑龍江馬隊一摺擒匪自偏竄雖杞後剽悍異常見在南至杞縣于相鋪北至蘭儀煙堦集均有大股盤踞距省垣不過數十里情形甚爲喫緊蘭儀接壤山東尤虞北竄郝上庠一軍見駐曹單赴援較近著文煜迅飭該署總兵星馳赴豫並飭濟東道黃良楷派勇一二千名總由北路馳赴蘭儀會合崇安併力堵剿至副都統德楞額駐紮韓莊距蘭儀較遠况須防堵山東本境未便遠離著毋庸調往瑛榮見於鄧州等處募勇到省助剿惟兵力尙單著關保卽由鹿邑督帶所部官兵赴省援應其巴揚阿所帶黑龍江馬隊一千名本爲湖北進剿皖匪之用况見在甫到直隸境內距豫省尙遠緩不濟急俟其經過河南時儻捻氛尙偏省城准由瑛榮飭令巴揚阿沿途剿洗以期迅就殲除儻情形稍鬆仍著該副都統管帶

赴楚北軍營不得任意截畱致有貽誤將此由六百里各諭令知

之○以曾望顏署四川總督賞譚廷襄三品頂帶署陝西巡撫已

直隸總督○以山東二麥歉收准改徵粟米○辛丑賜韓金甲等二十

九人武進士及第出身有差 幸圓明園○諭內閣前因勝保籲

懇回京穿孝疊經降旨以安徽軍務正當喫緊令該大臣畱營督

辦俟軍務稍緩再行奏請茲復據勝保瀝情奏懇著准其回京穿

孝以遂其孝思所有欽差大臣關防著袁甲三前往署理督辦皖

省軍務勝保所統旗綠各軍均歸節制勝保俟袁甲三到營後再

行回京漕運總督著聯英署理○諭軍機大臣等本日據勝保奏

瀝情籲懇仍准回京穿孝已明降諭旨允准並命袁甲三署理欽

差大臣督辦皖省軍務聯英署理漕運總督矣皖北捻匪勾結粵

逆勢甚披猖見在東路之盱眙北路之蒙宿屢經獲勝尙保無虞

惟懷遠一城居鳳潁之交久爲賊踞亟宜迅圖攻克與翁同書一軍合而爲一以便進攻淮南兼顧北路袁甲三接奉此旨俟聯英到任交卸後卽赴勝保軍營接受欽差大臣關防統領各軍卽當進攻懷遠迅掃賊氛毋得株守一隅致成渙散之勢勝保屢次挫敗該營布置未必悉臻妥善袁甲三到營後須力加整頓所有帶兵各員如有遷延觀望不用命者卽行嚴參懲辦以肅戎行至李世忠投誠後仍踞滁州傳聞有縱兵出掠之事今勝保已撥月餉一萬兩自當知感知奮約束麾下不擾居民並著袁甲三妥爲駕馭使爲我用不可稍存大意至清淮防務亦尙喫緊聯英接署漕督後著卽會同庚長妥爲調度防堵三河盱眙分竄之賊以保完善之區將此由六百里諭令知之○諭本日據勝保奏江蘇省原定每月協撥皖餉銀二萬兩六月以前並無延誤自七月以後積

欠至五萬五千兩之多請飭迅速補行撥解等語皖省見當勦賊喫緊著何桂清督飭藩司卽將七八九等月應解皖餉銀每月二萬兩如數補解以後仍按月源源接濟萬萬不准延宕將此由五百里諭令知之○命吏部左侍郎匡源吏部右侍郎文祥在軍機大臣上行走○壬寅予江西陣亡縣丞陸鈞等祭葬世職○癸卯諭內閣前邵亨豫奏皖省應試士子僅徽州甯國二府廣德一州經禮部奏定例四成取中加額二名茲據該學政奏稱見在應試士子不止三屬著加恩將本年己未科恩科及補行乙卯正科以六成取中五十四名其加額四名全歸本屆取中餘四成三十六名歸入下屆辛酉及補行戊午正科取中用示朕加惠士林至意○諭軍機大臣等據翁同書奏皖北糜爛已極敬擬補救三策一摺朕詳加披閱所奏不爲無見楚軍於八月二十八日攻拔石牌



僞城斬馘無遺當諭令乘勝克復太湖縣城節節進剿嗣據曾國藩奏稱以兩軍循江而下規取安慶桐城兩軍循山而進規取舒城廬州當令官文等再行悉心會商所有東下四軍內應如何派出一軍取路光固潁州繞出蒙亳以北與勝保等官軍會合南剿俾逆匪不至北犯尙未據該大臣等覆奏此次會剿大舉關繫全局利害必須謀定後動計出萬全茲復將翁同書所奏寄示官文等籌議矣該撫所稱苗沛霖練丁可用前經勝保奏已於山東河南兩省漕糧項下各撥五萬石以濟苗沛霖李世忠等軍餉毋庸再行議撥見在楚省援師尙無到皖日期該撫惟有扼守壽州與傅振邦關保聯絡一氣互爲聲援暫保西路俟袁甲三到後會商進剿毋得株守一隅致成坐困之勢將此由六百里諭令知之○諭前據官文奏請令曾國藩分兵剿皖當諭籌商酌度復據曾國

藩奏分兵四路籌剿皖匪欲由太湖潛山以取桐城由英山霍山以取舒城由六安規復廬州由宿松石牌以取安慶布置極密該侍郎見已回駐巴河想分布妥協不日卽分道進兵矣茲據翁同書奏皖北糜爛已極賊跨長淮之險其勢亦張該撫一軍在淮潁之交與六安形勢相接如楚師騰趨而入可以收腹背夾攻之效儻別遣勁旅萬人間道疾趨英霍直擣舒城得舒城則桐城潛太皆下徐出奇兵以圖懷定漸復皖境此爲上策所籌與曾國藩前奏尙屬相符惟楚師東下節節進取尙需時日已諭該撫等力保皖境以待楚師著官文胡林翼將翁同書所陳三策加之參酌咨商曾國藩等謀定後動務期計出萬全以奏膚功原摺著鈔給閱看將此由五百里諭令知之○諭瑛棨等奏股匪竄駛通許尉氏會商籌剿一摺此股皖捻前已撲擾睢杞分竄蘭儀乃承惠所帶

兵勇由商邱虞夏追賊至毫竟遭挫折其由杞縣分股之賊復竄陷蘭儀縣城圍撲考城通許並至尉氏縣之黎寺堡等處焚掠雖據該撫等奏稱蘭儀一股經崇安疊次獲勝復於考城東北爲鄉團截擊敗奔而南路通許尉氏距省切近且舞陽北舞渡陳州周家口等處皆該匪熟路甚恐蔓延雖關係刻卽親赴通許並飭崇安承惠等折回來擊覽其所奏情形著著落後待各軍馳至該逆已飽掠而歸徒成尾追之勢殊堪痛恨本日據文煜奏捻匪已闖入曹縣邊境又有分股由閒道撲直隸東明之信似此豕突狼奔擾及鄰境皆因豫省堵剿不力之故著關保嚴飭各將弁併力殲除毋令分股北竄儻再旁擾他處恐難當此重咎德楞額馬隊勢難遠調巴揚阿所帶黑龍江西丹馬隊一千名儻經過河南時賊氛未淨著瑛棨暫令沿途勒洗如軍情稍鬆仍遵前旨飭赴楚北

軍營不得久畱豫省致有貽誤將此由六百里諭令知之○論文  
煜奏捻逆北竄徑撲曹縣東明一摺逆捻屢次窺伺曹單近又分  
股欲撲東明畿輔重地豈容該匪竄擾恆福前因大名順德廣平  
三府地方緊要派員辦理團練譚廷襄見署理陝西巡撫所有大  
名一帶團練卽飭候補道丁守存協同大名鎮道實力堵剿此股  
賊匪剽疾異常恐團練不足抵禦著恆福於大名防兵之外添派  
得力將弁酌帶精銳官兵馳往東明一帶迎頭截擊毋任蔓延郝  
上庠見署曹州鎮辦賊匪是其專責據文煜奏已由漕于集等  
防所統帶馬步大隊拔營前進是否迎剿蘭儀竄匪抑或北赴直  
境未據該撫詳細具奏且瑛榮奏蘭儀之匪業已東竄文煜奏該  
匪尙聚蘭儀是否另有一股並著文煜查明馳奏嚴飭該署鎮偵  
賊所向務將此股捻匪殄除淨盡毋稍遷延將此由五百里各諭

令知之○兩江總督何桂清等奏遵查大學士彭蘊章呈出匿名書函所陳漕弊情形得旨此摺著與大學士都察院堂官及科道等閱看是否全係實情著聯銜覆奏彭蘊章著回避○河南巡撫瑛榮等奏關保督隊由商賈進剿馳抵陳畱該匪仍竄往通許情形得旨似此著著落後飽掠而歸徒成尾追之勢何日方可殲除不料關保身經百戰者乃若是度事不明殊堪痛恨○予陣亡訓導李鍾山祭葬世職○甲辰刑部奏遵議烏什辦事大臣保恆等奏覆訊楊自舜用刀砍傷楊昇身死另行酌擬一摺得旨楊自舜仍著改爲應斬著監候秋後處決豈有若是情節刑部率依原駁定擬足徵事事不留心之故刑部堂官均著傳旨申飭○乙巳諭軍機大臣等僧格林沁恆福奏遵籌宣洩河水請簡大員會同查辦一摺據稱海河河水寬深潮水長落並無一定非人力所能施

其滄州等處挑濬壩牐前曾查辦民間多稱未便請派員會同履勘再行興辦等語宣洩河水之議係由候補道丁守存函致彭蘊章四品頂帶李湘棻函致匡源而李湘棻言之尤爲詳細是以該大臣等據實奏聞請飭籌辦見據僧格林沁等奏請派熟悉河務人員會勘京中並無可派之員惟丁守存等言之鑿鑿或有把握此時直隸南路喫緊丁守存既經派往辦團自未便遽行調回李湘棻又偕郭嵩燾前往山東如能調李湘棻先回津郡著令其將所言宣洩事宜詳細臚陳卽由僧格林沁恆福派委妥員會同該員逐處履勘如有把握再行奏請興辦儻多窒礙卽著毋庸辦理將此諭令知之○諭據恆福奏稱賊由蘭儀竄至東明縣之杜家集長垣縣之前黃集等處均經本地鄉團兵勇截擊獲勝賊始敗竄懇請調兵添派大員統帶並截畱黑龍江西丹各等語東明長

垣係屬直隸門戶稍有疏虞則北路必致震動見在賊蹤已竄至曹考一帶恆福業經調派宣化鎮總兵阿麟保馳赴大名布置惟兵力尙單准其將巴揚阿所帶黑龍江西丹一千名暫畱堵剿俟賊蹤遠遁卽飭巴揚阿統帶由河南前赴湖北至統兵大員著派樂善迅速馳赴大名一帶總統馬步各隊擇要駐紮以固疆圉如擒匪竄至邊境卽當痛加殲戮以勦爲防不可徒事株守將此由四百里諭令知之○丙午刑部奏遵議直隸總督恆福奏定天津鍋匪罪名請照強盜律科罪殺傷人命之案並參照閩粵等省械鬪斃命及回人結夥傷人各例科罪辦理該督所稱聚數十人及百人以上持械殺傷人命照拏辦土匪正法之處應毋庸議得旨該督所擬是爲因時制宜起見原爲嚴懲於一時刑部所議太覺寬縱著仍照恆福所擬以儆刁風刑部所議不准行著御前大臣

軍機大臣閱看足見刑部堂司各官惑於習氣不肯爲任怨之人

也○以崇實爲內閣學士

由詹事選

張芾爲左副都御史

候補三品京堂

○以

沈兆雲爲浙江布政使黃經爲山西按察使

由河東道選

○以捐輸軍

餉永廣江蘇泰興學額三名四川綿州一名○戊申諭軍機大臣

等本日據傳振邦奏添派兵勇截剿北竄捻匪一摺此股捻匪節

據瑛榮文煜恆福等奏竄陷蘭儀圍逼考城並分股竄曹縣及直

隸之長垣東明經本地團勇擊退後復竄至曹考一帶與該提督

所奏大略相同傳振邦探聞賊撲定陶業經飛催派赴北路之鎮

將前進復加派兵勇一千名令參將胡元昌帶赴河北一帶其已

經派往豫省之博崇武高玉振等所帶馬隊復經飛調轉赴山東

相機堵截所辦尙屬妥協惟賊蹤剽悍異常旣經駛過河北且竄

入直隸山東境內亟應痛加剿洗以固北路藩籬傳振邦惟當飭



令胡元昌等軍會合東省官兵繞由北路迎頭截擊偏令仍回老巢斷不可自南路攻剿驅賊北來致成尾追之勢將此由六百里諭令知之○諭本日據傅振邦奏病體尙未大愈請派員幫辦等語業經降旨著太原鎮總兵田在田馳驛前往幫辦矣見在徐宿捻匪肆擾時圖北竄經傅振邦撥兵策應軍務正當喫緊著英桂卽飭該總兵迅速啟程馳赴傅振邦軍營毋稍遲延所有太原鎮總兵員缺著該撫派員署理將此由六百里諭令知之○命山西太原鎮總兵官田在田馳赴雲南提督傅振邦軍營幫辦三省剿匪事宜○己酉諭軍機大臣等恆福奏賊竄東明長垣等處當經諭令統兵需員卽派樂善迅速馳往大名一帶擇要駐紮茲據僧格林沁等奏探聞捻匪被長垣兵勇擊敗後復被曹單兵團擊退分股竄往河南通許等處北路情形已鬆樂善卽毋庸派令前往

所有直隸防兵馬步各隊卽著責令阿麟保統帶擇要駐紮實力防剿以固疆圉將此諭令知之○諭僧格林沁等奏擒匪情形稍緩請將黑龍江西丹馬隊畱駐豫北防剿一摺見在河南境內關係已親赴通許兼有崇安承惠等併力夾擊諒此股敗竄餘匪不難力就殲除所有巴揚阿統帶之馬隊著瑛榮仍遵前旨體察情形飭令迅赴湖北不可久事稽延況此項係生力之軍正宜乘其銳氣以征皖匪斷不准瑛榮任意截畱致有疲乏至此項馬隊抵楚時官文等擬撥向何路進攻如由光固六安一路進兵需用此軍卽可就近調撥著官文胡林翼探明巴揚阿馬隊進抵何處飛速派員催提可也將此由六百里各諭令知之○庚戌諭軍機大臣等本日據勝保奏攻剿懷遠疊獲勝仗並翁同書奏西南北各擒情形擒首張落刑盤踞懷遠句結粵逆勢甚猖獗兩月以來經

勝保安籌布置見以盱眙獲勝明光賊亦退遁督飭各軍分路直  
擣連獲大勝儻能於十月內攻克懷城皖北軍務自有轉機翁同  
書以懷逆與鳳陽定遠聯成一氣慮不力攻臨淮奪取明光恐致  
大股竄往盱眙欲令張得勝由盱眙疾擣明光李世忠由關山直  
擣藕塘固以牽制北路賊勢而尙未悉明光賊退之信此時西路  
之太和阜陽縣境各有捻匪攻撲亟應迅籌擊退南路匪黨聞楚  
師將至欲以全力相抗該撫已派都司陳松等前往爲楚師嚮導  
著該大臣等妥籌夾擊機宜其定遠以北之捻亦應督飭各軍迅  
速攻剿勿令該匪分股赴廬方操勝算袁甲三接奉前旨計卽日  
馳往勝保軍營接署關防所有各路軍情著與勝保翁同書通盤  
籌畫務臻周妥苗沛霖練丁打仗出力經翁同書撥與糧臺米糧  
一千石自必倍加奮勉惟前據勝保奏請於山東河南兩省漕糧

內分撥五萬石以濟苗沛霖李世忠等軍餉已據文煜覆奏於地  
丁項下動銀五萬兩抵作米五萬石解赴勝保軍營卽係接濟苗  
沛霖軍食之用若彼此均不咨商將來必致重複至該撫另片請  
協濟軍餉等語除江西省見須籌解湖北及曾國藩月餉恐未能  
再濟皖北所請毋庸議外其四川每月應解一萬五千兩本日已  
諭有鳳迅卽籌解此後袁甲三署任並著與翁同書仍照前議將  
軍餉勻撥分用毋稍偏枯其李世忠一軍並著勝保飭令奮勇報  
效毋任株守將此由六百里各諭令知之○諭前因翁同書奏准  
撥四川餉銀至今尙未報解皖軍待餉孔亟飢潰堪虞請旨飭催  
等語著有鳳仍遵前旨每月撥銀一萬五千兩如期徑解壽州軍  
營毋得遷延推諉將此由五百里諭令知之○諭前經降旨諭令  
曾望顏署理四川總督見在四川筠連高縣慶符三邑爲滇匪分

股竄擾相繼失守飛催官兵馳赴援剿辦理軍務正當喫緊之時臬司蔣徵蒲已同萬福帶兵出省由南廣分路進攻計省城中惟有鳳祥奎二人駐守有鳳雖兼署四川總督事務而成都將軍本任亦有應辦事宜副都統伊琿額見又因病出缺勢難兼顧著曾望顏於接奉諭旨後卽日馳驛迅速前往四川署理總督事務所有陝西巡撫前有旨令譚廷襄署理其未到任以前卽著布政使慶廉署理以便曾望顏交卸起程毋稍延緩將此由五百里諭令知之○景瀄祿權奏署副都統富尼揚阿會晤木里斐岳幅詳細開導烏蘇里綏芬不與俄國連界無所用其查勘令其收回人船該酋愈加奮怒聲言到璦琿另有剖辯並催該副都統下船卽溯流上駛奏入命特普欽等實力開導相機措置○撥山東司庫銀十萬兩解赴天津備軍需○辛亥諭軍機大臣等曹澍鍾奏逆匪

分竄柳州等處請全畱湖南援兵截剿並先諭張運蘭赴鄂等語  
劉長佑所帶之兵前已准畱粵西剿匪蕭啟江一軍亦已諭令窮  
追石逆毋令免脫並諭知曾國藩見在蕭啟江未能調回酌量另  
調張運蘭回鄂茲據曹澍鍾奏稱蕭啟江接奉曾國藩札調會剿  
皖匪稟請拔營回楚自係該侍郎尙未接奉前次諭旨廣西賊勢  
非蔣益澧所能獨支該撫見擬分兵由柳北融縣懷遠一帶繞出  
賊前由雒容柳城一帶包鈔賊後爲會合夾攻之計著准其畱蕭  
啟江一軍與劉長佑會合剿辦俟事竣酌撤回楚至該撫請將張  
運蘭先調赴曾國藩軍營差遣以補蕭啟江一軍之數固屬兼籌  
並顧惟據駱秉章前奏張運蘭率所部由衡赴郴獲勝後卽由郴  
宜越境追賊急切未能更調而皖境自廬以北粵逆勾結捻匪勢  
甚鴟張曾國藩議分四路進兵之舉亦屬不能稍緩並須厚集兵

力方能大舉深入蕭啟江張運蘭既不能刻卽回軍除調回李續  
宜一軍外有無別項兵勇可調能否卽日東征著曾國藩妥籌調  
派總期援皖剿粵兩無貽誤方臻妥善至石達開逆蹤剿疾能卽  
在粵境聚殲固爲上策據曹澍鍾奏該逆欲由懷遠至洪江等處  
趨黔入蜀急須豫籌堵剿雖田興恕已由武岡紮甯靖州一帶扼  
截但與其扼於黔蜀之交不若控其奔黔之路著駱秉章飭該  
署總兵探賊所向擇要防剿迎頭截擊勿致落後將此由六百里  
諭令知之○何桂清奏潮州臺灣兩處各國私自買賣已越三年  
此次米國懇請先行開市亦因貿易已久欲掩其私開之迹尙屬  
心存恭順未便執意阻止奏入命何桂清與米國使臣會晤後妥  
爲籌議具奏○命前任山東巡撫崇恩以內閣學士候補○癸丑  
永定河隄工合龍○甲寅諭內閣翁同書奏太和亳州擊退捻逆

並潁州等處見在勦撫情形一摺太和縣城於九月二十四日解圍其另股捻匪由石家營竄擾亳州亦經署知州博銘會同總兵朱連泰等督飭練勇擊退至潁州一帶居民爲捻匪迫脅蓄髮非皆甘心從逆前因湖南巡撫駱秉章於逆賊竄楚時出示招撫脅從至二萬餘人之多辦理妥善曾經通諭各路統兵大臣及各督撫查照辦理見在翁同書於潁阜各屬被脅民人勦撫兼施除南召潁河及沙河以南等處圩民業經薙髮歸正外其餘被脅入夥之人但能薙髮投誠卽屬良民一體給與免死護票地方文武毋得妄加殺害果有才能尙堪效用者並准其投營效力立功後准予保奏其或投誠後故智復萌心存反覆者仍著悉數勦除毋稍姑息以副朕仁育義正一秉大公至意○乙卯諭軍機大臣等前因勝保憑情籲請回京穿孝降旨令袁甲三署理欽差大臣關防



督辦皖省軍務並諭令於到營後整頓一切以資統率本日據袁甲三奏皖省軍務萬分喫緊增兵增餉一時均屬掣肘懇請飭曾國藩署理欽差關防各等語曾國藩前有分路大舉入皖之議因派援廣西之蕭啟江等軍一時未能撤回不知何時可以入皖而皖北捻逆徧地勝保攻剿懷遠正當喫緊豈可統率無人致有鬆懈況曾國藩所部皆楚南兵將於皖北情形未必熟習袁甲三前爲勝保幫辦所有統帶馬隊各員皆所熟悉但能力加整頓便可進攻懷遠迅掃賊氛該署大臣當仍遵前旨迅速啟程前往以便勝保交卸回京至勝保賢孝爲期不過百日袁甲三此行原係暫署儻勝保到京後另有差使再行另派大員前往安徽代袁甲三之任屆時聽候諭旨遵行可也將此由六百里諭令知之○實授袁甲三漕運總督仍署欽差大臣督辦安徽軍務○丙辰諭軍機

大臣等偕格林沁恆福奏遵旨議覆海口撤防各事宜並恆福密陳偕格林沁辦防勞瘁請令入都陛見來春再行赴津各一摺僧格林沁自正月到防後籌畫調度不辭勞瘁夏間擊退夷船大彰捷伐迄今又逾數月朕欣慰之餘時深繫念見屆節候歷冬海河冰凍俟南來漕船無復到津該大臣卽帶領京營官兵回京以資休息恆福著卽回保定以便整理地方公事所有畱防兵丁統交樂善管帶仍著嚴密防範毋得稍涉疏忽除輪流防守礮臺外其餘或擇附近地方令其棲止以示體恤著偕格林沁恆福斟酌辦理仍著樂善妥爲彈壓毋令滋事應需餉項前已諭令文煜由山東撥銀十萬兩趕於年內解到能否足敷三月支放畱防兵餉應否照防兵開銷抑或仍照征兵之處並著查例具奏至山海關應添防兵除卓索圖盟兵一千名本日已飭調並交協理台吉阿勒

坦提普博木濟特帶領於明年正月底到關屆時著派珠勒亨前往管帶訓練其通永宣化官兵各五百名卽著恆福先期調撥其由甯河至山海關沿海一帶團練事務卽著傳諭山海關監督會同候補道柏春安爲辦理毋得有名無實所有兵勇均交格綢額統帶毋庸另派大員盛京應辦防務亦經諭令玉明等豫備籌畫矣將此諭令知之○諭勝保奏偪攻懷遠擊退援賊並攻克縣城各一摺捻首張落刑自上年四月間竄踞懷遠縣城到處煽誘蔓延淮河北此等兇渠亟應趕緊殲除方免復肆句結據該大臣所奏十三日夜間擊毀浮橋想此時張逆已奪路逃竄迫克復懷城餘賊向西奔逃亦未指明何處著該大臣督飭各軍實力窮追務將餘匪搜捕淨盡並探明張逆逃往何處認真追捕庶不至克一空城貽患他處見在該大臣撥兵防守懷遠仍著酌抽兵勇進

擣臨淮毋稍遲延爲要將此由六百里諭令知之○勝保奏官軍攻克懷遠請將遊擊黃開榜等酌加獎勵得旨十三日夜擊毀浮橋想張逆已豫爲走路止贖餘賊故攻克若是之速並甚不費手特分爲二次拜發不獨不泯前夜之功兼爲後文伏筆殊屬非是○以江蘇六合軍營失利革提督李若珠職欽差大臣和春下部議處子陣亡副將蔡其驃等祭葬世職○丁巳諭軍機大臣等何桂清奏米國使臣請將條約宣示各口先在潮州臺灣開市一摺何桂清在崑山與米利堅使臣華若翰會晤該使臣堅以宣示條約等三事爲請此外各條及上海善後章程稅則均照前議緩辦經該大臣與該使臣要約明白該使臣惟求恩膏速沛俾永久相安情詞尙屬恭順加恩著照所請所有潮州臺灣兩口准米國先行開市並照新章完納船隻噸鈔其餘新章稅則等項暫緩舉行

該大臣卽行文各海口一體遵照辦理其潮州臺灣兩口內應行設關徵收商稅之處並著會同該督撫妥議章程具奏○諭戶部奏革商虧短官項請飭原籍各督撫查鈔產業各等語戶部開設字字官號查出革商虧短官項甚鉅著追一年有餘或全未完交或以鈔條見錢帖等項抵虛實屬膽玩已極大干法紀經該部查得宇升革商韓得祿係山西汾陽縣人宇恆革商顧青田係浙江上虞縣人宇豐革商馬錫祿係直隸棗強縣人著恆福英桂羅遵殿密派委員會同各該地方官將該革商等原籍田房鋪戶產業速卽嚴密查封報部覈辦毋許絲毫隱匿儻承辦官員有縱容隱瞞等弊立卽嚴參治罪將此各諭令知之○諭有鳳奏楚防情形較緩黔省賊氛復熾見擬移師進剿一摺據稱粵匪被剿南竄距川省已遠惟黔省婺川及松桃等處教匪復熾逼近川疆各處恐

粵逆潛入句結見在到防兵勇一萬有餘足敷調撥正可乘此兵力厚集之時出境相機進剿與黔省官兵合力夾擊俟婺川等處一律肅清卽移此得勝之師前赴西秀會剿猫猫山教匪著有鳳與蔣玉龍先期議定會合鄰境紳團等同日進剿以牽制賊勢總期以剿爲防不至虛糜兵餉至滇匪竄擾筠連等縣提督萬福等馳往剿辦前經諭令將防堵西秀黔彭一路官兵酌分一半派得力將弁帶往敘州協同剿辦此時是否將次藏事著有鳳將近日剿辦情形詳晰馳奏將此由五百里諭令知之○予安徽涇縣陣亡遊擊石玉龍等祭葬世職○戊午諭軍機大臣等蔣霽遠奏軍務喫緊兵餉告竭請飭催川楚協餉接濟一摺貴州上下游地方尙未肅清毗連川省復被賊擾粵匪又欲假道黔境防剿正在喫緊各營兵練應支餉銀積欠至數月及年餘之久非空言所能撫

慰四川應解黔餉僅據解過銀二萬兩湖南則以見辦軍務未能籌解爲詞當此軍務緊要之時需餉實難刻緩著有鳳駱秉章迅將應撥黔餉趕緊籌解縱不能如數撥給亦應先解數萬兩以應急需以後源源接濟毋稍推諉將此由五百里各諭令知之○己未諭內閣戶部查明五字革商虧短官款並司員蒙混辦稿當派端華等分往各處將該革員及該革商等寓所家產並自開鋪戶查封茲據端華等覆奏查封家產什物開單呈覽所有已革司員台斐音王正誼李守愚榮溥吳庭溥李壽蓉鳳山賈銘愼及各革商等均著派審王大臣會同刑部嚴行審訊有無隱匿寄頓毋任狡賴已革商人馬錫祿前期搬運什物並伊眷屬已赴通州顯有隱匿情弊著順天府嚴密緝拏查封備抵已革商人張兆麟住房據供係張成借與居住是否屬實著該王大臣會同刑部嚴行審

明辦理其在逃各犯著步軍統領衙門嚴拏務獲歸案審訊○諭  
勝保奏遵保盱眙出力人員開單請獎一摺逆匪復竄盱眙經官  
兵奮勇擊退在事出力員弁自應量予恩施以昭激勸此次勝保  
所保文員並未聲敘勞績且人數眾多不無冒濫除業經加恩之  
前任廬州府知府立誠從九品汪炳吉權子璜外著袁甲三按名  
查覈擇其實在出力者酌量保奏毋許含混至各該員等半係他  
省人員勝保於何時奏調到營抑係各該員自行投效奏明有案  
著一併查明具奏朕聞勝保廣收廢員濫行保奏有意市恩人言  
藉藉著袁甲三到營後確查隨營文員如辦理糧臺文案不可少  
之人方准畱營辦事此外濫竽充數之員概行裁汰以杜取巧而  
昭覈實○以劉長佑爲廣西布政使張凱嵩爲廣西按察使

由左江道

○庚申諭內閣瑛榮關保奏追剿南路捻匪疊獲勝仗餘匪潰



遁回巢一摺擒匪竄擾河南舞陽郾城關保派令副將王鳳祥等馳抵洪河追殺數十里救出被裹難民千餘口又有紛竄至鄆陵等處者關保統隊馳至太康縣之王隆集知縣祝壇亦帶勇趕至合力進擊陣斬髮捻二千五百名餘匪向東南敗走關保飭令王鳳祥等馬隊緊躡賊蹤併力勦洗沿途接殺敗匪甚多餘賊奪路東奔聞道回巢河南地方漸次肅清著瑛琰關保仍督各路官軍務將竄匪盡力搜捕以靖疆圉並飭近賊州縣實力團練守禦毋令蔓延○辛酉特普欽奏木酋復到黑龍江城卽令署副都統愛伸泰阻截木酋木酋不答驅車而去復飭愛伸泰至海蘭泡與之會晤並詳加開導該酋雖未聽信而綏芬烏蘇里等地方中國不肯借給居住之意已明白宣示奏入命特普欽等豫籌布置迅速奏明辦理○壬戌官文曾國藩胡林翼奏自古辦竊號之賊與辦

流賊不同辦流賊法當豫防以待其至堅守以挫其銳辦竊號之賊法當翦除枝葉併擣老巢今之洪秀泉踞金陵陳玉城踞安慶竊號之賊也后達開等之由浙而閩而江而湖南而廣西及龔張捻股之分合無定流賊之象也自洪楊內亂鎮江克復金陵逆首兇醜久衰徒以陳玉城往來江北牽掣兵力接濟賊糧故東南迄未收復耳竊以爲欲廓清諸路必先攻破金陵全局一振而後江南大營之兵可以分勦數省其餉亦可分潤數處欲攻破金陵必先駐重兵於滁和去江甯之外屏斷蕪湖之糧路欲駐兵滁和必先圍安慶以破陳逆之老巢兼擣廬州以攻陳逆所必救誠能圍攻兩處略取旁縣該逆備多力分不特不敢悉力北竄並不敢一意東顧江浦六合蓋竊號之賊未有不竭力以護其根本也見擬四路進兵自江濱而北第一路由宿松石牌以規安慶

臣曾國藩

親自任之第二路由太湖潛山以取桐城多隆阿鮑超等任之第三路由英山霍山以取舒城臣胡林翼親自任之先駐楚皖之交調度諸軍兼籌轉運第四路由商固以規廬州調回李續宜一軍任之袁甲三等原奏恐驅賊北竄請由光固潁州繞赴北路等語查湘勇久戰江濱於淮北賊情地勢不甚熟悉能否繞出懷蒙以北應俟李續宜軍至固始後察看情形再行奏明辦理至蕭啟江一軍臣曾國藩前經檄調來鄂日內當已由粵回湘張運蘭給假休息難遽北來應懇 皇上天恩仍飭蕭啟江來皖俾臣等稍收臂指之助 上諭軍機大臣等前因楚軍東下應防匪眾北竄並蕭啟江一軍已准暫畱廣西張運蘭派防郴州諭令曾國藩別籌兵勇本日據官文等奏稱鄉勇於淮北形勢未能熟悉尙須俟李續宜兵到再行查看具奏並曾國藩見患目疾請假各等語曾國

藩著賞假一月在營調理該侍郎一路兵勇既待另籌而李績宜亦係獨當一面復因母病給假是四路中已有二路急難進征於皖北待援情形實有緩不濟急之勢至所稱先圍安慶兼擣廬州以攻賊之所必救該逆備多力分不惟不敢悉力北竄並不敢壹意東顧浦六所籌尙爲周妥但恐言之易而行之難此時擒匪與匪既連爲一氣皖豫徐州各帶兵大員竭力環攻猶時虞其北竄若得楚師鼓行而東聲威較壯然必須取道淮北方不至驅賊北趨所有前諭於四軍內派出一軍取道光固潁州繞出淮蒙以北之處仍著官文曾國藩胡林翼悉心籌辦至所請飭令浙江協解餉需該省於徽州甯國兩營月餉僅能敷衍再令協濟楚餉恐徒託空言本日仍諭令四川陝西山西各督撫將應解楚餉速按月籌解矣將此由六百里各諭令知之○諭前因官文奏請飭川陝

等省按月撥解軍餉當經降旨諭令四川江西陝西山西各督撫按月各撥銀三萬兩解赴湖北曾國藩軍營茲據官文等奏稱除江西按月撥解外陝西僅報解一萬兩四川山西並未報解等語見曾國藩會同湖北水陸各軍攻剿皖匪需餉甚鉅著曾望顏譚廷襄英桂仍遵前旨卽於四川陝西山西省按月如數撥解俾得士飽馬騰藉資得力毋再延宕致誤要需將此由六百里各諭令知之○調春佑爲吏部左侍郎基溥爲兵部右侍郎成琦爲戶部左侍郎文祥爲工部右侍郎愛仁爲吏部右侍郎轉文惠爲禮部左侍郎以伊精阿爲禮部右侍郎由內閣學士遷○調文俊爲盛京刑部右侍郎以雙福爲盛京禮部侍郎由內閣學士遷○賞雷以誠四品頂帶爲陝西按察使已革江蘇布政使○癸亥諭軍機大臣等前經戶部奏革商虧短官項諭令步軍統領衙門將該商保人王廷榮等四名查

拏務獲歸案究辦茲據該衙門覆奏除宇謙保人鄧文槐業經赴城投案外其宇升保人樊大旺已回山西介休縣原籍宇恆保人王廷榮原籍浙江於咸豐六年三月出京不知下落宇豐保人劉德全卽劉四已回保定府完縣原籍請飭各該督撫查拏解京等語著恆福英桂羅遵殿速卽派委幹員會同各該地方官將該保人等嚴密查拏務獲解京歸案訊辦毋任遠颺將此各諭令知之○諭本日據和春等奏揚州官軍擊剿逆匪獲勝南岸軍情喫緊力籌布置一摺六合逆黨悉數東趨麇集甘泉山司徒廟等處直逼揚城經總兵馬德昭等分路進攻踏平地道焚毀營壘逆眾敗退而賊首陳玉成復分遣醜類渡江南竄至金柱關等處見已逼近秣陵關欲鈔截大營後路東壩溧水軍情均形緊急經和春張國樞咨行鄭魁士等挑選精銳豫備並飭總兵劉季三等扼守金

陵南路長牆暨秣陵關等處晝夜嚴防所籌尙屬周妥惟陳玉成係狡悍劇賊此次未始非揚州兵力厚集未能北竄遂爾乘隙南趨爲避實擊虛之計秣陵關等處爲金陵大營後路豈容稍有疏虞著和春再行嚴飭將士添派兵勇窺伺所向儘力剿洗務將此股賊匪悉數殲除毋令蘭入腹地其攻撲揚州賊匪雖據稱望西鼠竄而賊巢尙屬林立並未遠遁著和春卽飭李若珠馬得昭等激勵將士乘勝進剿將甘泉山一帶賊壘悉數攻克以期層層進逼六合毋任日久蔓延將此由六百里諭令知之○兩廣總督勞崇光奏報桂林解圍賊踞永安州情形得旨若果粵楚兩軍深入會剿固爲甚好但恐賊眾兵單難期破竹之勢○予廣東陣亡知縣陶人杰等祭葬世職○免安徽陣亡布政使李孟羣前署廣西潯州府知府任內應賠稅銀○乙丑諭軍機大臣等錢寶青奏遵

旨詢悉湖北軍務見辦情形一摺楚軍赴皖之師擬分四路並進  
布置最爲周妥已據官文等詳細具奏惟胡林翼身任地方以籌  
畫全軍餉需爲最要若由英山霍山追剿深入萬山之中於全局  
情形不能兼顧深恐貽誤事機荆宜施道李續宜謀勇素著其所  
帶兵勇與胡林翼所部人數相當應令該員進取英霍胡林翼仍  
在黃州大營爲後路奇兵既可籌畫餉需兼可策應各路萬不可  
壹意進剿置地方公事於不顧至該副都御史所稱楚軍進攻出  
北路者應以六安爲止出南路者應以桐城爲止以全力搏安慶  
我軍沿江聲勢聯絡而援攻廬州牽制賊匪使不暇爲北竄之謀  
一旦出其不意則六安桐城之兵皆可襲廬州而取之所奏不爲  
無見著該大臣等與曾國藩妥爲籌畫斟酌緩急務使官軍互爲  
聲援確操勝算方爲妥善其由光固潁州繞出懷蒙以北之軍係



防賊北竄起見並著仍遵前旨悉心籌辦本日據官文奏遣撤吉林黑龍江傷病官兵西丹如數請選換等語此項官兵僅一百數十員名遣撤後無須換補見在巴揚阿所帶黑龍江西丹馬隊一千名將次到楚官文即可飛催前進以資攻剿黑龍江儘先協領滿洲副管松英額著准其就近赴部併案引見俟回旗事竣卽赴湖北聽候差遣將此由五百里諭令知之○是月賑直隸固安永清東安三縣災民口糧給修屋費蠲緩安州等五十二州縣暨津軍廳水災旱災新舊額賦緩征奉天牛莊防守衛鑲黃等五旗被水坍地額賦並撫恤牛莊蓋州地震災民陝西麟遊縣雹災本年原貸社倉麥穀

十一月丙寅朔諭內閣周天受奏賊竄黃池請將帶兵大員革職一摺十月十二日江北金柱關各路賊匪糾合蕪湖逆黨進犯黃

池防軍力戰相持高州鎮總兵蕭知音督軍援應頗有斬擒十二十六等日賊復增股進犯亭頭三里埂等處烏溪另股之賊亦由陸路直竄黃池賊眾兵單遂致失陷蕭知音以專閫大員督辦防務不能悉力堵剿致令防所失陷實屬督率無方著卽行革職仍舊軍營責令帶兵剿賊以觀後效其失事各員並傷亡員弁著周天受查明分別辦理仍著督飭添調及派援各兵勇認真剿辦收復地方毋稍延緩○諭軍機大臣等本日周天受奏賊竄黃池甯防喫緊一摺江北金柱關各路之賊糾合蕪湖逆匪由水陸進犯黃池官軍營盤不守總兵蕭知音退至新豐鎮此股逆匪勢極猖獗黃池旣失則灣沚亦屬可慮周天受見雖咨調各路兵勇進剿尙恐賊眾兵單不足以資抵禦羅遵殿所派兵勇亦恐緩不濟急著和春等酌撥勁旅協力援應務將該匪悉數剿除毋令蔓延將

此由六百里諭令知之○安徽巡撫翁同書奏鑪橋水阻官兵不能前進見飭練丁攻剿情形得旨此不過爲久居壽州敷衍小勝負仗以飾其避賊之名試問鑪橋尙不能過更何能規復定遠○已諭軍機大臣等有鳳奏賊撲敘州郡城官軍遷延不進請將帶兵大員懲處一摺敘屬匪徒旣據探報多係烏合之眾其兇悍者不過千餘人自無難立時撲滅萬福於抵牛市塢後遷延不進業已貽誤於前見經有鳳派令副將馬天貴統兵由富順迎剿並調阜陞酌帶渝城兵勇馳赴南溪會同永甯道陳枚進攻復檄調瓦寺土兵及建昌兵前往援應兵力不爲不厚阜陞見旣任提督卽著有鳳曾望顏責令總統各軍會合馬天貴等迅速進兵務將撲擾敘城匪眾悉數殲除卽將筠連等邑城池剋日收復毋任蔓延深入臬司蔣徵蒲有督催之責並著飭令會同署總兵馬天貴認

眞督勦如再有貽誤卽著從嚴參辦將此由六百里諭令知之○

以辭煥爲江甯布政使聯英爲江蘇按察使

由兩淮鹽運使遷

仍署漕運

總督○以勦匪遷延革四川提督萬福職摘按察使蔣徵蒲翎頂

○辛未諭內閣御史孫楫奏各省奏留丁憂人員請量爲分別以

示限制一摺自軍興以來丁憂人員或因管帶兵勇或因辦團勸

捐經各路統兵大臣及各督撫奏留差委原爲一時乏員接替起

見惟近來紛紛奏留恐未必皆軍營及各省必不可少之人甚至

有奏留服闋後就近起服並不回籍補行守制者殊非所以重倫

常而敦風化其應如何分別予以限制之處著吏部議奏○諭瑛

榮開保奏回竄擒匪撲擾鹿邑經官軍擊敗回巢豫境肅清一摺

擒匪竄擾豫境被勦東竄後復撲周家口經官軍併力衝殺殲斃

多名該匪窮蹙狂奔欲乘虛擾撲鹿邑經關保派令王鳳祥等扼

要堵截適後股援賊踵至官軍分兩翼掩殺馬隊直擣中堅賊勢奔潰救出難民二千餘口生擒李黑兒等五名正法二十三日逆擒全股擁至直撲我軍經官軍分隊抵禦陣斬千餘人該匪愈聚愈多分股直撲縣城經鹿邑縣知縣孫嘉臻等內外夾擊賊勢不支盡向東北狂奔副將博崇武等跟蹤追剿至亳州棗子集地方擊斃馬賊數十名生擒擒匪單和尚等三名正法豫省全境一律肅清剿辦尙屬得手所有在事出力員弁兵勇著准其查明彙案酌保○諭軍機大臣等瑛榮等奏擒匪潰竄回巢豫境見已肅清惟本年兩次竄擾視爲熟徑不可不豫爲設防該省馬隊無多不敷調撥見聞天津暫時撤防請飭僧格林沁選派黑龍江馬隊一千名派員管帶赴豫助剿如津防難撤卽請飭令黑龍江將軍挑派精兵或餘丁一千名迅赴軍營等語自係爲需兵緊要起見但

見在天津尙未撤防無兵可撥而黑龍江馬隊餘丁屢次飭撥早經該將軍奏明無可再調河南如有緩急需兵助剿傳振邦一軍相距不遠著該撫等卽與該提督商酌通融調遣以資攻剿將此由六百里諭令知之○戶部奏鐵錢局五廠清查完竣酌擬虧短各員分別議處勒限賠交並分期裁鑄撤廠得旨寶鑒劉崐改爲察議前管局務之惠親王恭親王奕訢尙書文彩一併交該部衙門察議具奏○甲戌諭軍機大臣等勝保奏連日進攻臨淮並布置防剿機宜一摺臨淮地方最爲扼要該逆悉力拒守張元龍首鼠兩端難保非陽爲投誠而暗助逆匪該大臣惟當嚴密防範不可墮其術中儻逆蹟顯然卽痛加剿洗以除後患見在進攻臨淮萬分喫緊袁甲三尙未到營勝保仍當嚴飭各軍奮力攻剿不可以交卸在卽稍存諉卸將此由六百里諭令知之○諭傳振邦奏

兵勇饑寒交迫請飭催欠解協餉一摺傳振邦軍營兵餉每月需銀九萬兩方能敷衍乃東豫晉陝四省月撥之款欠解積累過多截至十月止統計山東其欠解銀十萬兩河南欠解銀六萬兩山西欠解銀十八萬一千兩陝西欠解銀十三萬兩此外如袁甲三奏請截漕案內經部議由東豫兩省撥銀六萬兩及山東應解部議改撥浙江協領銀一萬九千兩均遲欠未解統計各該省共欠解銀五十五萬兩之多歲暮兵饑非空言所能撫卹著文煜瑛榮英桂慶廉各將月撥傳振邦餉銀二萬兩按月如數撥解不得仍前短少帶欠致滋貽誤其山東河南並著於每月初起解十五以前解到徐州軍營河南除餉票外仍須解足實銀二萬兩不得遲逾套搭所有該二省本年新欠之餉該撫等務飭藩司於年內掃數解清勿再遲延干咎其餘各該省舊欠銀兩並著各該撫酌籌

搭解該提督見調苗沛霖圍練圍攻袁徐兩圩需用糧石前經勝保奏請於山東河南兩省漕米內撥用原爲分給李世忠苗沛霖各一半嗣據文煜奏撥銀五萬兩以抵五萬石茲據勝保奏尙未解到暫文煜於應解勝保軍營銀五萬兩內撥銀一萬兩解赴傅振邦軍營以濟苗練兵需其餘迅解勝保軍營瑛榮應撥米石並酌量分撥毋使偏枯將此由六百里各諭令知之○戶部奏各省欠解歷年京餉延不報解請先將歷任河南巡撫藩司交部議處並飭各省遵限報解得旨依議速辦若再有意遲延於臘正以前不能解齊必將該督撫藩司一併嚴懲○左副都御史張芾奏請將兵部主事馬聯奎隨營效力得旨畱營不過希將來保獎况忠盡之後亦應護惜著飭來京銷假供職所請不准行○撥陝西司庫銀十萬兩備天津軍餉○丙子諭軍機大臣等有人奏川省匪



徒滋事係地方官激變等語據稱本年九月間有川省本地民人  
鼓起自雲南購販煙土至敘州府屬筠連縣地方因該縣徵收稅  
銀較多未能如數應付議畱二人爲質餘往措銀交納該縣以報  
獲奸細解府該府將二人駢誅遂致糾眾踞城分陷高縣慶符二  
邑如果屬實是該府縣擾民激變及至疊陷縣城遂以滇匪闖入  
爲詞重煩兵力曾望顏甫經署任無所用其回護著卽查明據實  
嚴參如係本省匪徒藉端滋事卽可設法解散至該地方文武各  
員並著查明下落一併具奏原摺著鈔給閱看將此由五百里諭  
令知之○丁丑和春奏逆匪陳玉城糾率死黨裹脅難民不下十  
餘萬眾由天長六合窺伺江浦軍營十月二十二日周天培派副  
將滕嗣林等乘其不備殺賊甚多該逆復於江浦南北兩岸築壘  
二十四日張國樸督同總兵張玉良帶領兵勇力據要衝派副將

賴鎮海督率艇師攻擣壽德洲賊壘直薄牯口擊沈逆船數隻逆營一座礮隄三座同時踏毀二十七日大股賊匪約數萬眾撲營甚急周天培傳令各出六成隊伍併力援剿賊勢稍卻另股分鈔後路各營我兵眾寡不敵以致全軍失利周天培裹創血戰力竭陣亡將弁兵勇傷亡頗多張國樑聞警督兵馳援始將逆隊擊回臣當派總兵馮子材帶兵三千人由三汊河馳往江浦聽候張國樑調遣見在江浦九里山一帶逆營縣亘三面環伺偏我縣城非分據要害堵截兼施不足挽回全局所幸各營士氣頗壯無不憤切同仇仍當激勵軍心設法進剿陣亡之署湖北提督周天培身經百戰忠勇軼倫一旦捐軀致命痛惜尤深合無仰懇 天恩飭部從優議卹以慰忠魂 臣與張國樑未能先事豫防實屬咎有應得並請交部議處再池州賊目聿志俊獻城投誠其所部之眾已

由李成謀帶赴楊載福水營聽候安插。上諭內閣和春奏浦口逆援攻陷官兵營壘見在嚴扼江浦自請議處一摺皖北粵逆糾集死黨屢撲浦口大營提督周天培派兵迎擊並經張國樑派撥兵勇前往援應詎以賊勢過重官兵眾寡不敵致周天培力竭陣亡營盤失陷見經張國樑親自馳赴江浦截擊著卽督飭將士實力扼剿將下竄逆匪悉數殲除欽差大臣江甯將軍和春幫辦軍務江南提督張國樑於逆賊竄擾未能先事豫防實有應得之咎均著交部議處○諭軍機大臣等本日據和春奏浦口逆援攻陷官軍營壘見在嚴扼江浦一摺江浦九里山一帶逆營綿亘三面環伺偪我縣城情形自屬萬分緊急張國樑業已督同張玉良等渡江馳援頗有斬馘並經和春派馮子材帶兵三千馳往聽候張國樑調遣見擬分據要害堵截兼施所籌均尙周妥著和春等激

勵將士先將九里山一帶逆營層層掃蕩以次攻復浦口免致賊氛延蔓另片奏賊目韋志俊投誠效順獻出池州其所部之眾已由李成謀帶赴楊載福水營聽候安插各等語該義勇自拔來歸志堪嘉尚惟所部之眾人數自必不少其如何妥爲安插及籌計口糧等事該大臣務當與官文等妥商辦理不可稍涉大意將此由六百里諭令知之○予浦口陣亡湖北提督周天培祭葬世職謚武壯○己卯諭內閣前因成琦奏朝審冊內浙江絞犯張汰聰謀殺胞弟張汰訓並呂瀛儀謀殺伊妻張氏各一案覈其情節應由緩改實當降旨交都察院主稿會同刑部大理寺覆覈具奏嗣據該堂官等覆奏於兩案情節均有含混不免回護刑部堂司各官處分復經詳細批示特派惠親王載垣會同都察院堂官再爲悉心定擬覆覈具奏茲據惠親王等奏稱張汰聰謀殺胞弟張汰

訓身死一案義絕情慘無可原宥其呂瀾儀謀殺伊妻張氏一案  
挾恨謀殺情節慘忍亦屬法無可寬請將張汰聰呂瀾儀二犯改  
入情實所議均屬允當浙江絞犯張汰聰呂瀾儀均著歸入本年  
情實卽行處絞所有辦理錯誤之原省應議各員並覆覈此兩案  
之刑部大理寺各員並刑部司員均著查取職名交部議處○諭  
都察院奏覆覈秋審未能悉心定擬自請議處一摺該堂官等於  
奉旨覆覈張汰聰呂瀾儀二案未能悉心詳覈有意含混綿森沈  
兆霖富廉均著交部查照訓飭硃批比例議處○諭惠親王等奏  
秋審案內寬緩互有參差請嚴定京外處分等語秋讞大典務在  
持平本年因四川山西秋審案內由緩改實起數較多業將各該  
督撫等交部議處惟失入之咎較失出尤重部臣或因處分較重  
不行議駁實非愼重人命之道此後秋審案件刑部已定擬實緩

經朕派員覈議更改及由覆勘朝審之員奏駁改定者應照各省督撫臬司之例改至幾案將覆覈之三法司分別議處至外官除由緩改實五起以上照例議處外其失入之案積至幾起應酌加處分著吏部一併妥議章程具奏○諭翁同書奏練勇攻剿潁州蒙城等處擒匪出力懇請鼓勵一摺川北道苗沛霖帶練赴潁州後進攻擒首程保民逆圩旋攻克高家圩斬獲不少該練長弁丁隨同苗沛霖防剿尙屬奮勉出力其蒙城各練攻破著名擒首葛襲孜老巢陣斬首逆埽蕩餘匪並截剿懷遠竄匪千餘名亦屬著有勞績著袁甲三會同翁同書一併擇尤奏請獎勵○庚辰以保守廣西省城賞巡撫曹澍鍾頭品頂帶道員蕭啟江以按察使用餘加銜升擢有差○予廣西陣亡副將胡顯高等祭葬世職○辛巳諭內閣本年冬至天壇大祀業經降旨親詣行禮一切禮節

並諭惠親王等安議具奏旋經該王大臣等議請朕行三跪九拜  
禮後仍遣王恭代朕思屆時仍欲勉行全禮以昭誠敬是以未卽  
降旨允准乃自上月偶感風寒迄今雖已就痊而步履尙未如常  
茲復據惠親王等合詞籲懇請朕暫緩親行仍遣王恭代揆諸朕  
昭事之心實有難安惟念 大禮攸關設有愆儀轉不足以昭誠  
恪不得已勉從所請本年冬至 圓丘大祀著派恭親王奕訢恭  
代行禮並著在紫禁城內齋宿先期一日詣 壇內齋宿朕卽在  
宮內敬謹致齋於二十八日仍親詣 天壇 皇穹宇行禮以嚴  
對越○勝保奏籌辦天長賊匪乞降情形得旨兵不血刃俾梟獍  
傾心固不妨網開一面與以自新惟看該大臣未親往受降朕實  
過慮或託爲歸心甚急實慮其另設詭謀將來駕馭一切惟責成  
袁甲三妥爲辦理慎勿墮其術中獎賞頂翎止可權爲軍營獎勵

俟立有勞績勦殺粵捻方准奏明請旨○予安徽陣亡知縣于養源等祭葬世職○壬午諭內閣繼善等奏請將積存票鈔暫行搭放等語廣恩庫積存票銀寶鈔過多若按銀九票一搭放勢必愈形壅滯除前奏准發給實銀之項仍放實銀並長蘆項下仍按原交銀五票五放給外所有藩司項下應放各款均著暫行仍照銀七票三支發以資節省俟積存票鈔搭放完竣再行體察情形奏明請旨○癸未諭內閣穆騰阿奏懇請簡派旗員協帶馬隊一摺前因勝保回旗寫孝命袁甲三署理欽差大臣督辦安徽軍務勝保所統旗綠各軍均歸節制穆騰阿係統帶馬隊大員自應靜候袁甲三隨時調度乃該副都統以主帥驟易慮及軍心解體並自陳力疾帶隊難免疏忽欲請另派滿洲大員協帶馬隊不過思得幫辦之權藉詞飾說豈能逃朕洞鑒向來各路軍營督帶馬隊多



派滿洲將領以其言語相通性情相習易資鈴束至於統兵大員由朕特簡令其運籌決策調度機宜不必定須滿洲人員方能勝任朕於滿漢臣僕視無二致卽如向榮以漢員爲欽差大臣該營有滿洲馬隊隨剿多年未聞該帶兵官等有敢不遵調遣者勝保督辦皖省軍務從前勝仗雖多賴馬隊之力乃自護城失事以後連次挫折馬隊亦多傷亡可見用兵之道全在調度有方豈可強分滿漢致開兵驕將惰之風今袁甲三甫蒞軍營該副都統應飭該官兵協力同心恪遵軍令何得先存意見妄行瀆陳穆騰阿著傳旨申飭所奏不准行○特普欽那敷德奏俄人於黑龍江城對岸蓋房並欲搶取糧石經署副都統愛伸泰與木酋辯論該酋以遞送公文爲詞仍欲接蓋房間至搶取糧石一節自知無理又託稱妄言之徒見在嚴拏重懲查該國歷年在黑龍江左岸占踞五

十餘屯卽黑河口以下直至東海亦蓋房多處擬將該城養育兵二百八十餘名並抵備西丹與官兵一體操練復由墨爾根布特哈備兵五百名統歸署副都統那爾胡善管帶聯絡該處旗民人等訓練以壯聲勢從之○甲申 上還宮○予安徽陣亡參將謝長禮等祭葬世職○乙酉諭內閣端華愛仁穆蔭奏遵旨查封家產各一摺倉場侍郎崇綸著暫行解任副都統銜前任科布多幫辦大臣熙麟著暫行革職均聽候傳訊該員等家產著一併查封慎刑司主事存印著解任交刑部歸案審訊○諭胡興仁奏懇賞假回籍省親一摺前任浙江在籍知縣楊炳咸呈控胡興仁在巡撫任內演劇爲樂等事降旨交何桂清查明具奏見在尙未據該督覆奏胡興仁著畱於浙江俟前案奏結後再行給假回籍省親○調成琦爲倉場侍郎文祥爲戶部左侍郎以國瑞爲工部右侍

郎由太僕寺少卿遷

○丙戌諭軍機大臣等羅遵殿奏皖南軍務及地漕

捐輸事宜請飭大員督辦一摺已明降諭旨自周天受以下悉歸張芾節制矣皖南五屬界在江南恐巡撫不能兼顧是以前議加該道按察使銜准其奏事所有各府州地漕及捐輸事宜自應責成該道經理張芾在徽州督兵日久卽著督飭該道認真催提並勸諭捐輸毋令紳富觀望以期接濟軍餉至所稱甯防喫緊必得張芾親往視師或移紮徽甯適中之地或往來於徽甯之間等語張芾坐鎮徽州恃該處山川險阻故得力遏賊鋒至徽甯之間若無堅城可守未便率行移動或往來於徽甯之間似尙可行著張芾酌度情形具奏嗣後皖南軍務著張芾與周天受會銜具奏如有不及會銜之處仍准周天受單銜具奏以一事權又據奏稱甯防官兵沾染軍營習氣鄭魁士督防未久不及整頓卽著周天受

力加訓練以期悉成勁旅將弁中如有不知振作兼染惡習之人並著張芾隨時查訪會同周天受參奏以肅戎行將此由五百里各諭令知之○命四川總督黃宗漢留京以侍郎候補○丁亥命樂斌來京陛見以林揚祖護理陝甘總督由甘肅布政使護理○己丑諭內閣吏部奏孝廉方正知縣懇請分發試用一摺向來各省保舉孝廉方正各員引見後以知縣用者例應雙月單月歸部銓選茲據該部奏候選知縣孫長順等呈稱銓選無期不甘自棄自應量爲變通俾得及時自效著准其籤分各省照拔貢知縣試用二年期滿後歸於拔貢補用一人之後將孝廉方正補用一人其以州同州判用者亦准其一體分發歸於試用班內序補○諭軍機大臣等前據和春奏池州逆首韋志俊投誠效順獻出城池所部之眾已由總兵李成謀等帶赴楊載福水營安插並設法防守池州各

情曾經寄諭和春將如何安插及籌計口糧等事與官文等妥商辦理韋志俊占踞池州爲日久竟能洗心革面自拔來歸志堪嘉尙將來楚軍東征皖匪正可藉壯聲勢惟所部人數眾多一切安插事宜著官文等妥籌迅速具奏將此由六百里諭令知之○吏部奏遵議覆嚴秋審罪犯未能悉心定擬之堂官綿森等處分得旨綿森等均著加恩改降三級畱任不准抵銷○庚寅諭內閣有鳳奏官軍收復筠連等三縣相機進剿一摺滇省匪徒竄陷四川筠連慶符高縣該匪李花夫率黨數百屯踞筠連縣十月十二日經守備涂太平等帶領兵練分抵該縣殺賊二百餘名餘匪潰逃會同該文武將筠連縣收復並於雙合山救出被匪圍困之代辦知縣於廷植及難民百餘人乘勝馳至高縣用大礮轟開南門兵練擁入殺斃首匪三名夥賊百餘名當將高縣收復署慶符縣

典史於水之招集團練約會該文武馳抵慶邑逆匪正欲撲河逃竄我兵迎頭堵擊殺斃賊目多名斬獲首級一百餘顆搜獲逆匪正法當卽收復慶符縣城見已添調官兵前往應援並咨會雲南迅派官兵馳往鹽井渡攻搗賊巢著卽殄盡根株毋畱餘孽此次克復三城文武紳團著卽望顏查明如實係攻城殺賊出力者准其擇尤保奏儻查係賊匪退出後收復城池未有戰功者卽著毋庸請獎以杜冒濫○諭卽望顏奏請申明軍法等語四川省官軍向稱精勁近聞各營兵驕將惰久未釐飭平時兵丁挾制營員動輒聚眾滋事及至奉調出征延不就道甚至沿途搶掠到營復不遵調度尙復成何事體此次滇匪竄入川境疊陷三邑久圍府城弁兵畏縮不前並有署守備余振海把總安定國見賊先逃以致署總兵馬天貴陣亡情事殊堪痛恨著會望顏查明該兩員實係

臨陣潰逃卽行正法以昭炯戒並著四川提督阜陞率同各該鎮總兵申明軍律力加整頓嗣後該官兵有能痛悔積習悉遵調度殺賊立功者卽著從優獎勵儻有仍前驕惰惡習致誤事機除將該兵丁照例治罪外並將該營員按照軍法懲辦決不寬貸懍之○諭軍機大臣等本日據曾望顏奏滇匪圍攻敘郡已將城外眞武山等處占踞攻撲府城滇黔逆匪分股竄入意圖合併情形危急請飭甘肅提督郭相忠帶領提標兵一千名馳往助剿等語川省本完善之區見被滇黔各匪滋擾亟應厚集兵力痛加剿洗惟該署督所請提標兵一千名不如於各營分撥挑選精壯湊足一千名之數著樂斌迅速如數派撥卽著郭相忠統帶由南站階州等處馳赴川省分途進剿以期迅歸賊氛勿致蔓延將此由六百里諭令知之○諭有鳳奏敘郡戰守情形並曾望顏奏請飭楚兵

赴援添調甘肅官兵請簡提督統帶各等語筠連等三縣城池業經收復敘州府城被圍日久雖悉力守禦未至失陷而賊黨裹脅愈多其眞武翠屏兩山之賊尙各踞守險隘必須痛加剿洗方免蔓延另股滇黔各匪闖入酉秀等處邊界亦應添調精兵以資剿辦曾望顏前調陝西兵一千名本日復照所請諭樂斌於該省各營內挑選勁旅一千名卽派提督郭相忠統帶由南站階州等處馳赴川省分途攻剿四川提督前已有旨著卓陞補授卽責成該提督嚴飭各軍迅速進剿如各將弁有仍前畏縮者卽以軍法從事毋稍寬縱曾望顏到省後儻敘州軍情仍復緊急卽著親往督辦至石達開竄至永安等處有蕭啟江一軍由桂林跟蹤追躡其川黔接境之區業經駱秉章飭令田興恕扼要防剿石逆未必遂能由黔入川湖南北官兵亦實難遠調川兵雖不足恃但能申明



軍律定當壁壘一新有鳳另片奏虎嵩林自願募勇投效等語該革員於本籍地方形勢及軍務情形尙能熟悉著卽飭其前赴敘郡會同勦辦滇匪將此由六百里諭令知之○予四川陣亡總兵官馬天貴等祭葬世職○辛卯諭內閣駱秉章奏勦辦粵西回竄股匪擒斬逆渠一摺江華賊匪何文彪等分竄楚粵邊界經駱秉章飭令直隸州知州黃淳熙副將陳品南疊次痛勦何文彪猶敢徑撲江藍廳城黃淳熙等赴援立解重圍攻克馬頭鋪朝陽錦陂等寨十餘處何文彪敗竄藍山首逆賴姓復竄入江藍廳城南之高村地方黃淳熙等同軍擊之卽選知府陳士杰同知魏喻義等各率所部追勦何逆由九疑洞至小源山一帶翻山而進連獲大勝生擒何文彪於簸箕山高村賴逆走踞楚粵交界牛尾嶺官兵據險進攻破入賊巢擒斬殆盡此次蕩平巨股賊匪殲戮萬數渠

目擒斬脅從解散辦理尙屬妥協各員弁勇丁出力人等著駱秉章覈實保奏候朕施恩○諭駱秉章奏派兵越剿廣東賊匪疊獲大勝一摺廣東賊匪竄入湖南宜章縣境敗竄連州之星子司經卽選道張運蘭等越境追剿立斬大旗賊目數名及悍賊百餘名立破九陂賊巢並將石塘賊巢攻破援賊四面紛出我軍散隊縱擊復斃賊二千餘名卽選道王文瑞進剿邵村泥潭之賊直擣三江城斃賊二千餘名三江城圍立解白虎墟老賊巢穴一律肅清此次楚軍越境追剿兩保危城疊獲大勝辦理甚爲得手其尤爲出力文武弁勇著駱秉章擇尤保奏○諭軍機大臣等據曹澍鍾奏酌撤蕭啟江一軍回鄂援皖並兜截賊蹤懇請飭催撥解餉銀等語九月二十二等日逆匪竄撲懷遠鎮天河等處經各團擊退敗回羅城慶遠柳城一帶挑濠築壘意圖負隅其意仍欲奔黔窺

伺川省見在田興恕一軍已諭令擇要防剿迎頭截擊自可嚴扼賊匪奔黔之路至蕭啟江一軍正與劉長佑由永福進兵會合剿辦雖經曾國藩調回催令赴鄂惟廣西兵力較單防剿正當喫緊之際仍著駱秉章曹澍鍾酌量情形是否堪以暫留並接濟兵餉使追剿石逆以固川省邊防昨據曾望顏奏滇黔逆匪分竄攻撲敘郡等處川省兵力難支已由陝甘二省撥兵前往儻石逆再由黔窺蜀僅有田興恕一軍扼要防剿恐兵力尙單曹澍鍾仍須偵探賊蹤督飭諸軍兜剿以期聚而殲旃至劉長佑月餉銀數萬兩向由湖南支發仍著駱秉章按數撥解毋誤要需其山西陝西應撥餉銀已諭令速解將此由六百里各諭令知之○諭何桂清奏英佛二國懇援米國章程完納船鈔請旨遵行一摺中國接待外國素守信義本年天津之事並非中國開釁今英國公使普魯斯

佛國公使布爾布隆以米國商船海關見照新章止徵船鈔銀每噸四錢照會何桂清懇請將該二國船鈔仿照徵收道光年間曾有將來如有新恩亦准各國均霑之語自應俯順商情一律辦理著何桂清咨飭五口通商處所凡英佛二國徵收船鈔銀均照米國新章准其每噸徵銀四錢以示朕加恩各國一秉大公之至意將此由六百里諭令知之○予陣亡參將彭聲發祭葬世職○癸巳曾國藩奏楚軍分路援皖臣由第一路循江而進卽於十月二十四日由巴河拔營十一月初三日行抵黃梅八月十三日進駐皖省之宿松縣紮營東北門外所有蕭啟江張運蘭二軍遵旨均不調回臣目疾醫治尙未痊愈就見在兵力勉強支持進剿實虞不足防守或尙可恃當遵旨另籌一軍繞赴淮北由臣官文會奏辦理報聞○追予廣東陣亡在籍郎中宋蔚謙建祠○甲午諭軍

機大臣等德楞額奏皖豫逆匪逼近東省請添調兵丁一摺逆匪北竄雖因運河蓄水未消不能徑過欲在利國驛紮筏搶渡德楞額瘡口未愈帶病扼守韓莊兵力甚單僅恃運河一帶團練鄉勇以爲捍禦該處爲東境門戶儻令闢入北路勢必蔓延山東省見在無重兵可調著瑛棨關保卽飭黃良楷由永城管帶兵勇二千名迅速回至山東韓莊等處隨同德楞額防剿勿稍遲誤將此由六百里諭令知之○諭傅振邦奏官軍連克兩圩賊復糾眾緊圍灘口營盤請調馬隊二千並請將博崇武等暫革畱營各摺片傅振邦分兵三路進逼淮北連克兩圩該賊嘯聚夥黨繞西北一帶直趨灘口並圖撲徐城灘軍更番迎擊該匪愈聚愈眾環築木圩北面處處賊蹤情形萬分危急自應添調勁旅以解重圍惟吉林黑龍江本已無兵可調天津夷務未竣官軍亦難抽撥勝保前調

德楞額馬隊五百名曾諭令攻克懷遠後仍折回韓莊見在灘營被圍自應先其所急著袁甲三卽飭令此項馬隊赴傅振邦軍營協力攻擊此外如有可撥之軍務卽迅速調派會合兜擊以杜北竄博崇武胡元昌帶兵回宿已降旨暫革畱營著傅振邦嚴飭該員等迅赴灘口救援以贖前愆儻不知愧奮卽著從嚴參辦毋稍姑容將此由六百里各諭令知之○乙未戶部奏報本月二十九日橐房失火延燒大堂各司請將員外郎舒度等交部嚴議並各堂官自請交部嚴議得旨舒度等均著暫行革職俟訊出有無情弊再行傳質瑞麟等未能防範實屬疏忽著一併交部嚴加議處至此案著歸入派審王大臣嚴審具奏若仍有抵賴狡猾之處卽行交訊○予直隸殉難知縣杜勝集等祭葬世職○是月蜀緩山西薩拉齊清水河二廳湖南澧州等十州縣衛吉林三姓地方雨

淮富安等十四場竈地水災雹災歉收新舊額賦並雜項銀款蠲減江蘇川沙等五十五廳州縣衛被兵莊屯額賦及各項徵銀

十二月丙申朔諭內閣蔣霽遠奏賊匪闖入湄潭縣城請將援剿不力之提督嚴議一摺貴州思南一帶匪徒竄入湄潭縣境經提督蔣玉龍馳往援剿與署知縣廖遇春分紮要隘協力堵截殺賊百餘名十月二十一日賊復糾集大股直撲縣城蔣玉龍於山王廟尖山坪等處接仗廖遇春亦帶練接應各斃賊數十名另股悍匪數千由松煙鋪鈔至官兵眾寡不敵以致縣城失守提督蔣玉龍援剿不力咎有應得惟究由餉缺兵單所致蔣玉龍著改爲交部議處其廖遇春及在城文武下落著該撫查明分別辦理○諭軍機大臣等前因粵西逆匪圖由黔省窺蜀恐田興恕一軍不足以資扼截諭令駱秉章等酌留蕭啟江在粵追剿毋任賊蹤他竄

本日據蔣爵遠奏探聞首逆石達開見已竄入慶遠裹脅不下十餘萬自羅城至落壘渡連營二百餘里十月二十六日分股由六合墟渡河竄踞德勝偏近南丹意欲由黔入蜀請飭田興恕速行回黔由都勻一帶迎剿等語田興恕一軍前據駱秉章奏明俟探明黔中消息再行前進見在賊匪欲由黔入川獨山荔波均形危急諒駱秉章已令進兵惟賊氛業已偏近著飭該副將星馳前往毋稍延緩至該逆人數眾多自應厚集兵力以資圍剿蕭啟江一軍前因曹澍鍾奏稱因楚中檄調急欲回軍曾降旨仍令暫畱粵西昨據曾國藩奏稱並未調回湖北所有蕭啟江兵勇仍著駱秉章接濟兵餉由曹澍鍾飭赴慶遠一帶追剿石逆毋令蔓延川省以保完善之區劉長佑所帶兵勇如粵西軍務漸定亦著與蕭啟江同往以助兵力將此由六百里各諭令知之○諭蔣爵遠奏請



飭催四川等省撥餉一摺據稱貴州賊匪鴟張勢甚危急兵勇因欠餉日多皆無鬪志而粵匪石達開欲圖假道黔境窺伺川疆防堵尤形緊迫通盤籌計非數十萬重餉斷難濟急請飭催四川湖南陝西山東山西各督撫將欠解黔餉迅卽籌撥以資接濟自係實在情形黔省與川楚唇齒相依黔匪一日不靖卽川楚一日不安若聽其餉匱兵飢防剿何能得力日久將不可復問著曾望顏駱秉章文煜英桂譚廷襄於欠解該省餉項無論何款迅卽籌撥解往俾資協濟毋任缺乏將此由六百里各諭令知之○以續捐軍餉再永廣浙江鄉試中額一名○予江西殉難縣丞蔡福田等祭葬世職○丁丑諭軍機大臣等僧格林沁恆福奏遵籌海防布置事宜繪圖呈覽並遵保山海關統兵大員各等語用兵之道不宜稍涉游移僧格林沁等以夷情願和則應在滬欲戰則必來津

大沽海口仍以雞心灘爲界儻夷船駛入毀我防具自應開礮轟擊使官兵有所適從不至懈怠其或在外遊駛卽派員迎至北塘告以彼處有人看待看其如何情形再行馳奏隨機應變均甚妥協其北塘陸路暗伏地雷不使占踞礮臺並有馬隊可以截擊又挑挖環濠布置事宜亦屬周密所請調察哈馬一千匹本日已諭令慶昫速行照數挑選於明年二月內解抵防所需調健銳等營京兵二千名亦已諭令各該營挑選候調惟京營距津二百餘里必令一日夜趕到恐人馬疲乏仍須先期數日奏調方妥至此項京兵宜選精銳者列爲前敵其次方令防守城濠而所築環濠據稱約三十五里仍應揀選練勇之中可恃者協助兵丁以資守禦山海關地方緊要自應謀勇兼優之員方足以資捍衛所保奕山賽尙阿俱未愜朕意仍著該大臣再行酌保候旨派往僧格林沁

勤勞在外瞬閱一年朕心嘉悅之餘尤深屬繫此時防務稍鬆著該大臣於本月中旬卽行來京陛見以慰朕念並可面授機宜俟來春再行赴津該大臣來京之前須將一切防務交與樂善西凌阿暫行管理恆福駐紮大沽呼應較靈並著暫緩回省與樂善等妥爲防守○挑八旗兩翼健銳營官兵各五百名外火器營官兵四百名內火器營巡捕營圓明園八旗營官兵各二百名備天津防所調用○調察哈爾馬一千匹赴天津防所備用○戊戌 上詣 大高殿祈雪○諭內閣前據御史孫楫奏各省奏畱丁憂人員請量爲分別以示限制當交吏部議奏茲據該部查照定章覈議具奏近來各省紛紛奏畱丁憂人員難保無夤緣請託之弊貪榮忘親於人心風俗殊有關繫嗣後軍務省分除管帶兵勇打仗出力實爲軍營必不可少之人准其奏畱差委並就近起復俟軍

務告竣仍飭令回籍分別補行守制窆孝外其餘辦理糧臺文案  
勸捐團練抽釐等項差使均不得將丁憂人員請畱差委其業經  
奏畱丁憂並就近起復人員著統兵大臣及各省督撫嚴行裁汰  
飭令回籍守制窆孝不得以經手事件未完爲詞再行瀆請其從  
前未在軍營丁憂後始行調往及業經回籍奔喪復藉詞游幕探  
親投效軍營奏畱差委者一概不准行以杜鑽營至軍務告竣省  
分曾經奏畱丁憂人員尙未服闋者卽飭令回籍補行守制已經  
服闋尙未回籍奔喪之候選候補及曾經補缺者卽飭令回籍補  
行窆孝百口已補缺者毋庸開缺以符舊制以上應回籍各員未  
經回籍之先均著停其升調選補並責成統兵大臣各省督撫認  
眞詳查分咨部科及該員本省督撫以備查覈如仍逗留在省在  
營有營求差委干預公事等情別經發覺將本員照例革職不卽

查參之大臣督撫亦照例議處再軍務省分奏留人員多有就近起復後並未回籍穿孝卽行改捐並指捐他省者尤屬有心取巧著由服官省分之督撫查明飭令回籍補行穿孝其尙未分發者俟補行穿孝後方准分發至實任人員遇有丁憂例不准請留本任其丁憂差委人員卽打仗出力亦不准請署實缺以前業經奏留者事竣後仍飭令回籍補行穿孝以重倫紀而肅官方另片奏駁直隸丁憂候補知縣杜恩祿不准留營差遣之處著依議行將此通諭知之○諭張亮基等奏剿捕邱北匪犯地方肅清一摺雲南陳得功黨匪瞿騰霄朱開甲等前因攻破邱北縣城官踞城並分撲廣西州城經兵練擊散並生擒首匪惟朱開甲等竄出復經鄉練堵截突圍奔逸各處伏兵盡起朱開甲被毆轟斃並斃匪千餘名奪獲器械旗幟無數要犯戴三夏成椿李永權等均經殺斃

復生擒儲存佩等均係隨同戕官踞城要犯當經梟示地方一律肅清該文武等按捕淨盡首惡無一漏網辦理尙屬得手所有疏防處分著加恩寬免其在事出力員弁及紳民等齊練捐貲均屬著有微勞著該督撫擇尤保奏候朕施恩○諭軍機大臣等張亮基等奏游匪竄入川境筠連等語四川筠連等三縣雖據有鳳奏業經官軍收復而敘州府城被圍日久署總兵馬天貴陣亡該省兵丁多不足恃方慮蔓延爲患茲據該督等奏滇匪李短搭搭等逃至牛皮寨係川匪溫如玉等勾結由桐子林竄至筠連一帶滋擾必得兩省會剿方足以殲醜類著張亮基徐之銘嚴飭該省地方文武督率兵練越境追剿會同川省帶兵提督阜陞等併力夾擊悉數殲除不准稍分畛域以兵單餉欠爲詞庶不令深入川境亦不至回竄滇疆是爲至要將此由六百里諭令知之○諭本日

據張亮基等奏滇南回務必須勦撫兼施見在勦除著名兇悍匪黨甚多而畏威求撫者亦復不少惟回性多疑須滇省回教中之位望較優者赴各處開導方足令其信服查該省在外仕宦有浙江知府馬椿齡素爲通省回民所服著羅遵殿飭令該員迅速回滇隨同張亮基等辦理招撫事宜毋稍延誤將此諭令知之○己亥諭內閣戶部奏遵議河南省應解工程及京甘各餉銀兩仍應如期籌解一摺前據瑛棨奏豫省應解萬年吉地工程銀兩除已解過外尙有欠解及續撥之款見因籌解各省軍餉該省各州縣本年除被擾被歉外其餘完善地方徵解無多惟有設法先將工程要款籌解其餘京餉甘餉等銀俟來年開徵再行報解等語當交戶部查覈速奏茲據奏稱河南省欠解工程銀兩既據聲稱籌解卽應趕緊設措務於年內解齊其續撥銀兩亦應遵照奏章依

限起解何至積成鉅款該省額徵應解及雜款帶徵爲數甚鉅卽使各屬偶有水旱偏災被賊擾害地方其完善之區催徵撥解儘足籌濟何得藉詞諉卸著瑛榮按照該部所議速將工程欠解續撥銀兩如期解交其應解各路軍餉著先將安徽等省要款按月解往並將欠解京餉甘餉分批報解毋得日久宕延至被災被擾地方必當確切查明覈實辦理儻一州縣中不過一二村莊被擾地方官藉詞影射冀免闔境錢糧是徒飽吏胥之橐而正賦日虧著該撫督飭藩司詳細查明分別辦理以剔弊竇而裕供支○諭德楞額奏兵勇擊退逆匪運河南岸一律肅清一摺皖捻出巢竄擾偏近東境於利國驛地方紮筏意圖搶渡運河經德楞額督率兵勇擊退蟲斃二百餘人奪獲木筏八隻生擒逆匪二十餘名該逆敗竄德楞額統帶全隊截殺追剿殲賊三四百人總兵雙齡亦



馳往柳泉一帶接捕生擒紅衣賊目二人斃賊數十人運河南岸  
一律肅清勦辦尙爲得手所有在事出力官紳弁勇著德楞額擇  
尤保奏數員以示鼓勵○庚子諭內閣端華等奏倉廩不戒於火  
請飭查辦並據查倉御史英華奏請將疏防之監督議處各一摺  
本月初三日儲濟倉失火燒毀豐字廩一座接連言字思字等兩  
廩俱被延燒該花戶人等有無情弊所供被燒廩座係屬空廩是  
否屬實均應徹底根究花戶陳志明著交刑部審訊該監督於倉  
儲重地未能先事豫防非尋常疏忽可比儲濟倉監督錫年景祥  
均著交部議處其已燒豐字等廩卽著倉場侍郎責令該監督花  
戶等自行賠修○諭和春奏官軍疊破江浦逆壘揚州邊界亦一  
律肅清一摺並江浦續獲勝仗等語自浦口官軍失利逆匪東伺  
揚儀西徧江浦南竄溧水等處兇燄甚熾經張國樑渡江躬親督

朔十一月十一日平毀北山新卡十四日攻破城南賊巢十五十六等日該逆於江邊磨洲地方搶築營壘官軍分四路環攻賊眾大挫狂奔北門外賊營亦同時攻破其陳家集等處之賊竄回天長揚州池西邊境一律肅清南路之賊窺伺溧水亦經防守官軍擊退二十三日江浦對岸地道內火藥轟發官軍並未受傷賊匪自斃無算猶敢從求兩山等處疊次來撲均經擊退斬馘無數官軍卽乘勢進剿將西北逆壘二十餘座悉行平毀該匪經此次疊加懲創其膽已寒卽著該大臣等激勵將士將浦口等處賊匪節節掃除無任久踞○予陣亡副都統銜常壽等祭葬世職○辛丑諭內閣前據何桂清等奏查明匿名書函所陳漕弊情形當經諭令大學士都察院堂官暨科道等閱看是否全係實情著聯銜覆奏本日據桂良等奏稱查閱原奏於官民交困胥役影射諸弊尙

有不實不盡如小民之苦由於州縣之浮收而非由於業田紳戶  
業田之苦不得謂較貧民爲更甚州縣之虧空非由於辦漕書差  
之侵漁實由州縣之回護請飭該督撫因時就勢力爲整頓等語  
江蘇省應徵漕糧甲於他省不肖州縣視爲利藪紳衿因而抗玩  
胥吏肆其橫恣遂致下困民生上虧國課弊患日深實堪痛恨自  
應亟籌整頓以挽積習此後該省州縣於徵收漕糧時如敢寬放  
斛身甚至以四五斛作爲一石藉稱運費任意浮折書吏於浮加  
之外復爲開斛淋尖手捧腳踢捉豬搖小船諸弊並紳戶假借影  
射抗欠把持刁生劣監包攬倉規均著該督撫明查暗訪隨時拏  
辦至州縣之虧空多以騰那借墊爲詞實則海運幫費不敵河運  
十分之一而浮收如故虧空益甚則或以償其逋負或以供其糜  
費且有交代之時作爲虧空展轉相承愈積愈鉅上司不敢過問

轉爲設法彌補官欠作爲民欠喪心昧良莫此爲甚其漕書地總之豪橫不肖紳衿之骫法分肥無非該州縣律躬不正不能不聽其恣肆著該督撫嚴飭各該州縣凡開徵漕糧總須足敷兌運方行折色不得以那款買米豫爲藉口地步如有以上諸弊一經查出卽著從嚴參辦斷不准稍事姑容至該省漕務之弊尤在以熟作荒此後各該州縣儻敢於應緩災戶仍行開徵俟徵足分數後將未完之數作爲災緩者嚴行參奏從重懲處該省目下雖軍務未竣而地方公事豈容置之不問該督撫等務當激發天良力除銅疾無論大戶小戶概令一律完納以紓民困而裕國用毋得畏難苟安自干咎戾其投遞匿名書函之人實屬不安本分仍著何桂清查拏究辦至御史富稼另摺奏稱請將貪婪不職及身家不清各員參革御史高延祐另摺奏稱署事人員不宜過多俸滿人

員始准保奏各等語均爲整飭吏治起見牧令佐貳等均爲親民之官豈容劣員濫廁卽著各直省督撫於各該屬中詳加查訪儻實有貪婪不職及身家不清者卽行嚴參治以應得之罪至署事代理人員不准過多吏部本有定章各督撫均宜遵守不得任意瞻徇濫行調署規避處分爲見好屬員地步其正任人員果有治績昭著者亦俟歷俸旣滿方准該督撫保奏不必專案送部引見務使久於其任官民相習庶地方藉資熟手於吏治民生均有裨益○予廣東嘉應州陣亡知州王濬修祭葬世職○壬寅諭內閣吏部尙書花沙納人品純樸學問優長由翰林蒙 皇考宣宗成皇帝疊加委任晉秩卿貳朕御極以後晉秩正卿勤慎宣勞克盡厥職方以年力正強長資倚畀茲聞溘逝悼惜殊深著賞加給陀羅經被派員勒載治帶領侍衛十員卽日前往奠醊並著賞銀三

百兩治喪由廣儲司給發照尙書例賜卹任內一切處分悉予開復應得卹典該衙門察例具奏伊子兵部員外郎希凱著俟百日孝滿後由該旗帶領引見用示朕篤念蓋臣之至意尋予祭葬諡文定○諭恩慶奏裏塘善後事件辦理完竣並請續設土司獎勵喇嘛一摺裏塘地方辦理招撫野番事宜經該委員宣維禮等妥爲開導均已率眾歸附令該堪布及土司等就地安插辦理尙屬妥協其會同出力之土守備銜仁臻工布既稱夷眾遵服著准其作爲續設五品土司妥爲撫馭卽著該部發給該土司號紙執照熱水塘焚修喇嘛稱勒達結准其戴用黃桃兒帽穿黃大褂以示獎勵委員試用通判莊裕崧見在辦理善後事竣仍著該部照例改指省分以符定制其格桑彭錯扎巴洛珠二名著解交前藏飭交地方官嚴加管束○諭軍機大臣等曾望顏奏滇匪分擾上游

見籌裁剿請飭催調兵一摺賊匪竄撲敘郡因帶兵文武觀望遷延遂致分竄擾及嘉定等處據提督阜陞咨報與南溪縣所稟迥不相符其爲捏飾無疑赤巖牛喜壩均爲賊竄高家場必由之路設有重兵駐紮何以任賊長驅如入無人之境臬司蔣徵蒲旣因賊竄高家場折回犍爲乃復由犍爲退至嘉定府城節節退縮實屬貽誤軍情著曾望顏查明該提督臬司玩泄情形據實嚴參並著該署督另揀大員統帶以免玩誤所調維州等協屯兵迅卽飭令赴省用資防剿其富順等縣鹽丁亟應妥爲安置嚴防勾結是爲至要該署督請催調楚兵三千名一節前已諭知見在該省防剿喫緊無可再調其前次奏調之陝西撫標等兵一千名昨諭樂斌速催文志等統帶前往至續行請調之甘肅提標兵一千名因樂斌奏稱存營兵單暫停徵調見在上游均形喫重毗連眉州等

處亦各戒嚴自當移緩就急本日已諭樂斌仍於甘省各營伍抽撥官兵一千名迅交郭相忠帶往川境助剿矣將此由六百里諭令知之○諭本日僧格林沁奏參郭嵩燾前往山東查辦事件未能妥協請旨一摺當降旨將郭嵩燾交部議處矣前因山東煙臺等處商船出入貿易所收正雜釐稅恐多隱匿侵吞之處特諭僧格林沁派令郭嵩燾前往嚴密訪查茲據僧格林沁奏該員前赴煙臺派委紳士設局抽釐未經會同李湘棻查辦又未及與文煜面商福山縣地方遽有不知姓名多人毆紳拆局之事當經文煜嚴飭地方拏究卽著該撫訊明該局紳士等有無辦理不善及賂削激變情事秉公審辦並查明從前陋規嚴除積弊毋稍徇隱郭嵩燾見已回至山東省城文煜校閱營伍事竣亦當旋省所有各口釐稅章程仍著與郭嵩燾面晤籌商奏明辦理總期有裨國用



無拂輿情方爲妥善郭嵩燾俟釐稅章程商定由文煜具奏後卽行回京聽候部議將此諭令知之○諭瑛榮關保奏捻擾宿永並據胡林翼函稱陳逆大股來援太湖恐分竄光固請飭調吉林馬隊助剿各等語楚師東征賊勢自必西熾豫省光固一帶情形喫重自應添兵助剿惟吉林馬隊萬無可撥前據官文等奏議分四軍征皖其第四路調回李續宜由光固以規廬州各情朕曾諭令該大臣等務令取道光固潁州繞出懷蒙以北方不至驅賊北趨想已籌酌辦理惟征皖必先保豫若楚師鼓行而東該逆走險擾及豫境誠恐關保等兵力難資堵禦著官文等迅飭李續宜一軍卽由光固一帶截其竄豫之路毋再延緩其前調西丹馬隊計可陸續到楚並著酌量抽分交李續宜帶往截剿楚軍未到之先仍著瑛榮等督飭將弁激勵鄉團扼要嚴防將此由六百里各諭令

知之○諭聯英等奏擒匪意圖分竄見籌防勦並整飭南路情形一摺捻逆分股出巢一趨濰溪一擾蕭境經傅振邦派兵繞截其竄撲景山柳泉等處之匪又經德楞額派隊同邳州知州張富年等擊退該署漕督等以宿桃完善之區責成地方文武擇要布置並飭安勇等嚴防衡陽一帶豫備打凌船隻隨時敲冰免致偷越所籌均尙妥協惟前據德楞額奏韓莊前面有銅山縣練總吳鏐之勇二三萬人向稱精銳因馬賊紛至練勇望風披靡等語此項練勇著聯英等查明係何員管帶如不得力卽酌量裁撤將此由四百里諭令知之○調全慶爲吏部尙書穆蔭爲兵部尙書以春佑爲理藩院尙書調德全爲吏部左侍郎伊勒東阿爲工部左侍郎以裕瑞爲理藩院左侍郎

由副都統遷

○以辦團出力永廣安徽宣城南陵學額各三名○癸卯諭內閣御史朱夢元奏冬令旱乾請

修人事以迓祥和一摺本年秋冬以來雨澤稀少節逾冬至未霽  
祥雲連日戶部衙署及儲濟倉並遭火患朕深宮修省敬畏時深  
大小臣工亦宜共加惕厲惟該御史所稱求治太銳不免操之已  
蹙除弊太急不無過爲已甚凡事務以慈祥爲念等語持論尙未  
平允近來部院各衙門辦事多趨苟且諸臣果能力求整頓固不  
宜專以刻薄殘忍爲能亦不可徒博寬大之名因循廢弛卽如見  
辦戶部鈔票局一案種種弊端層見疊出上虧國帑下朘旗民若  
不嚴行懲辦何以肅綱紀而對臣民從此懲一儆百各知悚惕不  
至自罹法網所以保全者不更大耶朕執兩用中毫無偏倚爾在  
廷諸臣亦當遇事持平同加儆省以副委任至刑部監禁人犯多  
有因案牽連久繫囹圄以致疾病待斃情殊可憫著該部見擬軍  
流等罪官常各犯查照舊章奏請減等徒罪以下趕緊清釐情輕

者取保候訊無辜者立予省釋並著順天府五城直隸總督一體查辦毋得視爲具文京師梟示首級著步軍統領衙門五城御史飭坊掩埋嗣後每年冬至前並著收埋一次以消沴氣其五城飯廠貧民過多恐有賑給不敷之處並著每日各加粟米一石及薪貲銀兩以廣周恤其各實力奉行藉資感召○諭官文胡林翼奏沔陽州地方猝被江水漫淹情形一摺湖北沔陽州屬一百四十一垸於本年十月猝被江水刷潰隄塍民房多有淹沒糧食漂失無存且係收穫之期補種無望亟應妥籌辦理著官文等嚴飭司道等迅速查勘被災地方輕重情形分別奏請蠲緩候朕加恩其遷徙災民並著飭令該管府州妥爲撫恤毋令失所用示朕軫念災區恩膏速沛至意○甲辰諭軍機大臣等本日據文煜奏請將報稅不實致滋事變之知縣革職提訊等語業經明降諭旨將撤

任福山縣知縣余栢革職嚴訊並將署知縣陳壽元交部議處矣  
因思煙臺設局抽釐先據郭嵩燾函致該撫商民並無異言何以  
忽有聚眾毀局毆傷紳董之事固難保無奸徒從中唆撥而起釁  
之由總因辦理不善在籍主事蕭銘占朕聞其平日不協鄉評其  
餘紳士亦並非素孚人望郭嵩燾起身以後該紳等額外加稅以  
致怨聲載道激而生變見經該撫獲犯嚴辦並提集余栢等嚴訊  
該革員如有隱匿侵吞及指使毆紳毀局等事不難水落石出若  
仍令蕭銘占等照舊接辦亦恐商民未能相安並著文煜將蕭銘  
占等撤去卽毋庸添派董事所有抽收釐稅俟該撫酌定章程後  
仍派地方賢員覈實經理並查明從前積弊嚴行裁汰務使商情  
允協官民相孚方爲妥善將此由五百里諭令知之○乙巳諭內  
閣瑛棨奏請將失察擅殺多命犯未全獲之知縣先行議處撤任

雷緝一摺副將李世忠家屬寄居陳州府遣其親戚陳繼謨帶勇  
十二人赴商城原籍行過淮甯縣所屬虹石橋地方該鄉民以該  
勇等各執器械疑係捻匪將陳繼謨等十三人全行殺斃淮甯縣  
知縣李澍毫無覺察非尋常疏忽可比雖經獲犯十一名並未訊  
出起意爲首及下手人數並贓物多寡實屬顛預李澍著卽撤任  
先行交部議處並勒限兩箇月畱於地方協同署任知縣將逃犯  
弋獲照例懲辦儻限滿不獲卽著從嚴參辦○丙午諭軍機大臣  
等將壽遠奏提督蔣玉龍所部兵練因糧餉告竭已多潰散該提  
督威令不行致賊匪聞風上竄已降旨將蔣玉龍先行革職畱營  
效力並命田興恕署理貴州提督矣貴州軍務喫緊兵心渙散蔣  
玉龍原帶兵練又因招集不至全行遣撤回川致甕安股匪漫入  
遵義南鄉近省之開州亦被賊竄情形萬分喫緊田興恕業已令

其署理提督著駱秉章催令帶同原隊兵勇星馳赴黔以資統率並將由黔入川賊匪悉力堵遏毋令蔓延至蕭啟江一軍曾降旨仍令暫畱粵西著曹澍鍾飭令速赴慶遠一帶追剿石逆以保川疆黔中軍務疲敝已極並飭該署提督力加整頓復振軍威迅殄賊氛毋負委任將此由六百里諭令知之○蔣霽遠因病賞假以海瑛署貴州巡撫由布政使署○以貴州三渡關兵潰革提督蔣玉龍職拔花翎畱營效力以候補總兵官田興恕署貴州提督○丁未諭軍機大臣等前因皖豫逆匪逼近東省當諭瑛榮關保飭黃良楷由永城管帶兵勇二千名迅回山東韓莊等處隨同德楞額防剿茲據文煜奏黃良楷帶勇多年上下相信是以遇仗得力今黃良楷將該勇帶回二千名下餘千名若仍令駐紮永城恐帶勇官不能駕馭請飭全數帶回等語山東出省會剿兵勇尙有富新所

帶一軍畱在灘口見當山東防務喫緊兵力不敷調撥著瑛榮關  
保卽飭黃良楷將所部誠勇三千名全數帶回防剿以厚兵力而  
收實效將此由五百里諭令知之○黑龍江副都統關保奏到豫  
接辦剿務所需兵餉積欠日久請飭下河南撫臣瑛榮按月撥解  
實銀四萬兩其從前積欠餉銀亦令搭解清款得旨戶部察覈該  
營有無各省欠款並豫省應撥之款速行籌畫具奏至該副都統  
與瑛榮共辦一事通融撥解事所常有若必待請旨飭下於軍營  
豈不慮其遲誤此摺看來文理通順必係該撫致信關係令其單  
銜具奏有旨嚴催便可藉口軍需置京餉於不顧更可暫免處分  
殊屬取巧○戊申以崇恩依奇哩慶英俱爲內閣學士崇恩前任  
巡撫依奇  
哩由翰林院侍講學士慶  
英由葉爾羌參贊大臣遷○己酉諭內閣袁甲三奏臨淮南岸暨  
剿擒營賊匪獲勝一摺逆匪占踞臨淮經官軍於南岸築營圍剿



十一月二十四日該逆一齊擁出直撲新營官軍用槍礮連環轟擊立斃悍賊數十名逆勢稍卻我兵奮力砍殺復斃賊百餘名二十五日又出馬步悍賊數千來撲官軍分三路進剿先將執旗馬賊擊倒馬隊從旁鈔入逆眾驚潰捲旗狂奔經萬斤大礮並礮船排列轟擊橫屍滿路千總徐皖奮勇撲入賊圩砍倒數賊中礮陣亡總兵張得勝親帶兵勇一擁齊進將墟中賊眾砍殺殆盡平毀土墟該逆於東面添設數卡經張得勝帶兵攻入踏毀賊卡二座斃匪四五十人剿辦尙屬得手著袁甲三督飭水陸各軍乘此聲威趕緊攻克臨淮毋任負隅久踞○庚戌諭內閣郭嵩燾奏請將辦理釐稅含混之前任巡撫議處一摺山東海口辦理釐稅自應奏定章程曉諭商民妥爲辦理前任巡撫崇恩於奉旨交辦之件僅札行各屬以致州縣視爲具文並不實力辦理崇恩久任山東

巡撫於地方情形必能熟悉乃於各海口通商繁盛之處並不據實奏明殊屬玩泄崇恩已補授內閣學士著降補太常寺少卿以示薄懲○諭胡林翼奏距省較遠府屬招解人犯暫請由道員勘轉一摺湖北鄖陽襄陽宜昌施南四府所屬秋審並尋常遣軍流罪及命案徒罪人犯定例均不解省各由該管之安襄鄖荆道荆宜施道就近審明移司覆覈分別題咨見在該省軍務未竣積案愈繁著照所請暫將鄖陽襄陽宜昌施南四府所屬案件除情罪較重之凌遲斬梟絞決人犯仍照常解省審轉外其斬絞監候並命案遣軍流犯同荊州府所屬秋審等項解道審報院司覈辦俟該省軍務告竣再行照舊例辦理○諭軍機大臣等前因煙臺有聚眾毀局毆傷紳董之事降旨令文煜將在籍主事蕭銘卣等撤去毋庸添派董事茲據郭嵩燾文煜奏稱煙臺釐局畱委員董步

雲督辦仍派蕭銘卣等分管銀錢帳簿自係尙未接奉前旨辦理釐稅雖不能專任地方官而紳士不得其人徒滋流弊著文煜仍遵前旨遴選廉幹妥員會同地方官妥爲辦理毋庸添派紳董務使官民相安可期經久將此諭令知之○辛亥諭內閣駱秉章奏建立專祠書院表揚忠義一招湖南省自江忠源羅澤南王鑫塔齊布李續賓等先後募勇訓練兵丁百戰粵黔江鄂之間悉成勁旅其部曲疆場效命者尤不乏人忠義之風照耀區宇江忠源等業經優加卹典備予褒榮並准其建立專祠用彰盛節此次著照駱秉章所請准其於長沙省城再行建祠其部下員弁兵勇曾經賜卹者並准其一律附祀以慰忠魂至該省帶兵出境各官紳追贈提督湖北鄖陽鎮總兵瞿騰龍浙江提督鄧紹夏候補副將周雲耀保升遊擊趙永年候補同知直隸州知州趙啟玉卽選知府

劉騰鴻劉騰鶴追贈鹽運使銜運同丁銳義訓導儲玖躬從九品  
毛英勃都司武昌顯等或在鄰疆擊賊捐軀或於本省力戰殞命  
並著照該撫所請別建表忠祠祭祀所有該省陣亡員弁兵勇一  
律附祀並准其建立求忠書院令陣亡各員後嗣入院讀書所需  
經費除地方紳富捐助外卽由該撫率屬捐辦以昭激勸而勵忠  
貞○諭駱秉章奏楚軍越剿黔境賊匪收復鎮遠府衛兩城一摺  
貴州鎮遠府衛兩城失陷後苗匪教匪麇聚思州接境各處其唐  
家營風崖谷定鶯鶯響鼓五聖尤賊淵藪倚險抗拒經駱秉章飭  
令道銜知府兆琛會同署貴州糧道韓超署思州府知府陳岳霖  
駐營思州之遊擊張萬書等各路兵勇分股進擊先將風崖唐家  
營谷定賊壘攻破焚燒斬獲甚眾鶯鶯響鼓五聖賊棄壘而奔各軍進攻  
響鼓壘賊復恃險死拒並有鎮遠及鬼計寨苗另股教匪會合援

應調補按察使畱任道員翟誥檄飭所部與兆琛張萬書等軍分  
投鈔擊賊援盡潰望賊不支被脅難民赴營求撫五里一律肅清  
鎮遠府衛兩城之賊聞風喪膽都司周洪印首先進擊楚軍各路  
繼至賊勢敗潰府衛兩城同時攻入城外賊營一併踏殺賊數  
百奪獲軍械甚多見將餘寨分別勦撫所辦尙屬得宜所有在事  
出力員弁兵勇著駱秉章酌覈彙案保奏候朕施恩地方善後事  
宜仍著會同該省文武妥爲辦理○諭駱秉章奏勦辦廣東禾洞  
賊匪大獲勝仗連州連山一帶地方肅清一摺廣東連山屬禾洞  
地方猺匪羅嘉誨與積年賊首何觀保李榮淑等合夥久踞該處  
經駱秉章密飭都司張廣勝等前往勦辦該逆等於連山禾洞上  
下門村一帶建木城六所互爲犄角張廣勝督同遊擊陳青雲參  
將文恆久都司易開俊遊擊何本高由白石山安馬水口破卡而

入與知府陳士杰所部會擣下門村參將劉松山等會擣上門村兩路同時攻破卡隘立將賊巢焚剿淨盡斃賊七八千人並賊目五十餘名餘匪五百餘名此次楚軍越境雕剿將積年巨憝迅速掃除實足快人心而昭天討所有出力員弁勇丁著駱秉章覈明彙入勦辦廣東賊匪案內一併奏請獎敘○壬子諭軍機大臣等有人奏李若珠庸鈍不知調度六合被困潰圍而出止帶本營之眾微服潛逃各營不見主將一時大亂爲賊所乘或死或擄約有五千人伊止報陣亡二千八百餘人兵勇生前未領之餉糧臺欲不發給而營中以爲其人生前應得之項必須發給各等語李若珠以提督大員身任幫辦於六合營盤被圍時不能傳齊各營一同殺出竟有易服潛逃之事致令兵勇多被傷亡已屬毫無調度至以傷亡之五千人止報二千八百餘人非獨死者含冤難邀卹

與且難保非爲冒領餉銀地步更出情理之外當此經費支絀之時豈容任聽各將弁如此營私毫無覺察著和春卽查明六合一仗陣亡兵勇究有若干人數其報明陣亡者若干人數如有冒領餉需等事卽著查明嚴行禁革以杜弊混李若珠如果庸懦無能並有前項情弊卽著和春於各營將弁內另行選擇奏派一員幫辦軍務李若珠卽著撤去幫辦又據奏近來帶勇將領每於勇額中虛報幾名以資津貼從前營勇八九折不等今日甚至有五折者甚或以難民充數賊至卽逃虛糜勇餉各等語軍營壯勇原期禦侮折衝以輔兵力之不足若如此有名無實尙復成何事體著和春查明此等無用之勇卽嚴行裁汰並將冒領勇糧剋扣發給之將領一併查明嚴參懲辦以除積弊再前據御史林之望奏懷遠民人胡文忠呈控勝保翁同書貽誤軍情各節當經寄諭令和

春會同何桂清查明具奏迄今日久未據奏到仍著該大臣會同該督迅速查明據實具奏將此由六百里諭令知之○癸丑諭內閣本日召見刑部郎中慶綱詢以秋審向來堂議何以分別寬緩該員率奏爲酌覆案情斬絞俱有寬緩及詢以闔殺之案亦有斬罪否又奏云闔殺多有議絞似此例文尙未閱悉不知該部堂官因何保列一等想因其奔走勤勞不過多見堂官幾面卽謂其例案熟悉可見保列一等並非認真辦案者慶綱著撤銷一等改爲二等刑部原保堂官暨覆帶出考堂官均著交吏部議處○諭袁甲三奏進剿臨淮南岸攻克賊墟獲勝一摺逆匪占踞臨淮經官軍於南岸築營痛剿營外賊墟尙多袁甲三飭令投誠之柳家墟練總柳偉約同各墟與官兵訂期舉事初七日官軍分隊渡河豫伏墟外約定先從蔣墟舉火爲號扒牆而上逆眾不及抵禦我軍



乘勢撲入斃賊不計其數柳偉卽在賊館放火將賊館圍定焚燒逆眾焚斬殆盡計共燒斃賊匪一千餘名砍斃六百餘名生擒三百八十餘名並將著名僞旗主焚斃多名當將柳墟攻破初八日該逆糾合匪眾環撲柳墟意圖報復經官軍剿斃馬賊二十餘名步賊三百餘名餘賊敗竄回巢初九日夜官軍分攻附近之湯家墟等處該逆傾巢出拒官軍先用槍礮轟擊逆勢不支我軍乘勝鈔殺橫屍遍野餘賊不敢回巢望東南狂奔兵勇直壓至臨淮關口將新奪土墟扼要駐守剿辦尙屬得手著袁甲三督飭官軍練勇乘此聲威迅卽攻克臨淮毋任負隅久踞所有此次出力員弁兵勇及投誠立功之柳偉著袁甲三存記俟攻克臨淮後彙案酌保候朕施恩○諭軍機大臣等翁同書奏兵練擊賊疊次獲勝粵捻見謀西竄壽州情形喫緊一摺壽州東南兩路官軍雖於莊木

橋等處疊次獲勝不過因賊已潰竄削平逆壘並未令其大受懲創至逆首陳玉城一股昨據和春奏報該逆因被張國樑擊敗竄去茲復據翁同書奏稱該逆因聞楚師勢盛遂由江浦六合帶領二十餘軍意圖西竄六安以拒楚師北犯壽州以牽掣皖軍見在廬舒等處逆蹤麇聚等語是該逆陳玉城竄突情形極爲猖獗西擾六安北撲壽州均屬可慮見在翁同書兵力較單著袁甲三力籌兼顧探有賊匪大股竄至星速派撥兵勇前往助剿如能派馬隊往援更爲得力並著酌量辦理翁同書仍當激勵兵勇力扼賊衝不得以餉缺兵少等詞藉口致有疏失將此由六百里各諭令知之○特普欽等奏烏魯蘇牡丹卡房雖在許借俄國界址之內而設立自康熙年間且係要隘處所此次該國人因船隻行駛不便催令遷移又未允許乃轉謂此卡爲占其左岸借居之地突令

密奇達將卡房燒毀當派佐領鄂爾精阿前往海蘭泡查訊據該國通事石沙木勒幅直認不諱並云木里斐岳幅嗔怒故令燒毀如欲重修可移在右岸等語見經派員在黑龍江城修妥木房由水道拉運至該處照舊修蓋業已一律工竣擬派官兵常川駐守奏入上嘉之○浙江巡撫羅遵殿奏本屆海運提前趕辦並籌變通之法得旨所奏殊無把握層層折耗實非計之得也著戶部速議具奏○甲寅頒 硃筆諭大學士六部理藩院尙書侍郎都察院堂官等國家設官分職在部院衙門司員御史原欲其諳練政體詳求例意今日爲儲材之淵藪異日出爲方面自能才識出眾茂著循聲意至深典至鉅也今則不然進身之始卽百計營求豫爲保舉地步非入署幫印幫橐卽檔房學習日日奔走僕僕勤則勤矣於部務何益於例案之輕重分別以及清弊之源更不必問

矣試問如此無恥之輩昏夜乞憐之徒在內卽無立身之品一日  
濫膺薦牘焉望其奉公守法不過到省後先計其缺分之肥瘠量  
一歲之所入爲奉承老師上官地步不數年病呈又入告矣滿載  
而歸徒飽私囊爲子孫置產之資胥吾民之脂膏也爲堂官者率  
不察其人品辦事若何止就目前所見應對明晰卽許其部務熟  
諳甚至暗受屬託瞻徇情面視保舉爲市恩無怪乎司員視一等  
爲美具也朕痛恨此習深賴諸卿善體朕意爲朕惜才勿視硃諭  
爲贅言也況滿漢堂司本無歧視原應一體辦公近見各部司員  
漢員尙有講求例案者居心公正固不乏人而把持不許滿員入  
手者亦屬不少滿員復甘認頽唐者更幸一等記名早離部署今  
日之藏垢納汙豫博美譽爲將來貪婪肥己之具而已嗣後各部  
無論滿漢司員初到部者概不許幫印幫橐筆帖式初到部者亦

不許檔房學習總期試以實事觀其成功杜奔競之風爲國家收得人之效爾諸卿其共勉之○諭軍機大臣等袁甲三傳振邦奏督兵接出灘口全軍復分路兜剿將賊逼退一摺據稱捻匪圍攻灘營傳振邦督兵由倉里進紮於二十八日親督大隊由東南兩面齊進並飭博崇武等帶馬隊赴趙墟伏伺賊見我軍進攻齊出迎拒經胡元昌等內外夾攻襲破賊壘灘軍乘勢撤出袁甲三復抽撥兵勇至宿援剿初八日傳振邦飭令各軍由歇馬山進剿滾營而進三戰三捷直逼灘口該逆計窮盡棄灘口巢穴等語此次灘軍被圍旋即設法接出復將灘口之賊全行逼退惟賊勢眾多並未大受懲創此時田在田已到軍營著傳振邦會同該總兵督飭兵勇迅將此股賊匪盡數殄除富新龔耀倫旣衝出重圍卽飭令跟蹤追剿毋令蔓延將此由六百里諭令知之○浙江巡撫羅

遵殿奏本年杭嘉湖三府屬應徵起運漕白等糧七十二萬餘石  
請准援案紅白兼收秬稷並納得旨所請紅白兼收秬稷並納之  
處著不准行○予江南陣亡知縣沈節之等祭葬世職○乙卯諭  
軍機大臣等張芾奏皖南大概情形並請飭籌徽甯餉銀等語徽  
甯二府逼近賊氛自上年浙餉停解數次兩營俱欠餉數月茲據  
張芾請由浙江按月解徵餉八萬兩甯餉十二萬兩如有不敷再  
由本地設法籌辦自係爲通籌大局起見惟浙省因江南大營措  
貲募勇甯由許乃釗勸捐五十萬前據羅遵殿奏擬飭各屬捐借  
並行能否踴躍輸將集成鉅款似亦尙無把握江西與徽州府地  
界毗連唇齒相依見在該省匪徒業已肅清錢漕等項當可協撥  
何桂清統轄江西著與惲光宸通盤籌畫可否按月籌解徵餉八  
萬兩其甯餉十二萬仍由浙江協濟則事以分任而易成最爲妥

善儻江西因防兵尙未盡撤不能如數撥解亦須設法籌措不分  
畛域以顧大局羅遵殿仍當力籌勸捐以資接濟著與何桂清惲  
光宸會同商酌妥爲辦理至張芾旣督辦皖南軍務見雖駐紮徽  
州如遇有防務喫緊之處著仍遵前旨酌量情形往來督辦毋誤  
事機以副委任將此由五百里各諭令知之○予浙江陣亡典史  
沈元英祭葬世職○丙辰 上詣 大高殿祈雪○丁巳楊載福  
奏池州投誠之聿志俊派其部下頭目古澹賢等率隊往攻蕪湖  
聿志俊在府城分派防堵建德石埭等處一面曉諭賊眾概行薙  
髮詎料古澹賢等於十月初九日回撲府城聿志俊等會同官軍  
迎擊疊有斬擒十四日該逆復率大股直撲千總李楚材營盤我  
軍開礮轟擊賊勢披靡官軍追殺二十餘里該逆遁歸青陽銅陵  
等處糾約賊目楊輔青復攻池州經彭玉麟督率水師各營並聿

志俊等竭力擊退該逆又率大股竄擾柳波磯一帶三十日韋志俊正在城外與賊接仗該逆乘間攻撲城垣池州府城復陷臣見紮調韋志俊領眾前來張溪鎮就近安撫並咨呈湖廣督臣官文等將彭玉麟一軍移紮黃石磯與臣協同剿撫更爲得力至此大陣亡之千總謝如友等懇請飭部分別議卹上諭內閣此次池州府城復陷著楊載福仍飭在事將弁督同韋志俊奮力剿洗設法攻復毋任賊匪久踞陣亡之千總謝如友著交部照守備例議卹外委周新田著交部照例議卹○官文胡林翼奏桐潛大股逆黨陸續竄至槎水畝欲襲我軍之後經參將余際昌等親督兵勇進攻該逆分股出撲我軍鈔出賊後首尾夾擊賊眾大潰立將賊壘平毀斃賊一千四百名傳聞逆首陳玉城糾集十萬之眾欲上犯楚境鈔襲太湖我軍後路以解太城之圍臣等已於各要隘



分兵堵禦並嚴飭各軍迅速剿辦以期早克堅城報聞○戊午予河南陣亡參領那蘇巴圖等祭葬世職○庚申諭軍機大臣等曾望顏奏川省見辦軍務情形各等語川省自賊匪分股上竄之後附省各屬州縣均有土匪乘機竊發見派文武員弁分投密捕該署督自應仍在省城藉資坐鎮惟土匪本係良民全在地方官辦理得宜自不至重煩兵力見在各屬土匪蜂起著責成地方文武聯絡紳董實行團練密速按捕安撫良民如各該州縣中有庸懦無能或貪劣不協輿情者卽著從嚴參辦另委賢能之員妥爲辦理不可稍涉遷就至前調陝西兵一千名計已陸續到川續調甘肅兵一千名本日據樂斌奏已飭提督郭相忠統帶兼程前進不日亦可趕到此項官兵到川後仍歸該提督管帶以資得力斷不可分撥各處防剿致令兵將不習阜陞精力就衰見調總兵占泰

幫同勦辦著曾望顏察看卓陞如難勝督兵重任卽著令郭相忠  
統帶以資得力遊擊張必祿准其暫行畱川隨同勦匪俟軍務完  
竣飭回湖北本任湖南休致副將何勝先見寓省城准其由該署  
督差遣如果著有勞績酌量獎勵所請起用之處著不准行將此  
由六百里諭令知之○特普欽等奏俄人因烏魯蘇牡丹卡房被  
毀後重行修整欲令拆移江右愛伸泰面見夷目布色依開導不  
允旋派該國官綽羅尼等四人帶領三十餘人並傳集附近居夷  
各帶器械將重修卡房肆行砍毀該處並無屯居旗戶非厚集兵  
力難與較量擬將該卡暫移江右霍羅綽地方與阿敦吉林卡倫  
接續可期無誤文報奏入諭特普欽等嚴行拒守○辛酉頒 硃  
諭今歲入冬以來未霑雪澤朕心殷盼實深著差內務府司官一  
員齎大藏香十支馳驛往山東省城交巡撫文煜傳旨令布政使

清盛慶詣泰山謁誠叩禱代朕祈請 神祇以迓祥和○壬戌諭  
內閣前惠親王等奏秋審案內實緩參差請嚴定中外處分等語  
又給事中包煒條陳秋審失出處分定擬章程一摺先後降旨交  
惠親王載垣會同吏部歸併妥議章程具奏茲據奏詳查例案分  
別各條開單呈覽秋讞大典中外司刑各衙門均宜虛衷詳覆期  
於無枉無縱外省錯擬實緩罪名既有處分專條刑部爲刑名總  
匯之區向例未有處分明文不足以昭儆惕自應比照外省酌定  
章程分別處分所請酌加外省秋審失入處分並於起數多寡之  
中分別幾案定擬失出處分及刑部自行審理案件與覆議各省  
秋審案件失出失入處分均如所議辦理至都察院大理寺於各  
省案犯具題到部止係會覈罪名其歸入秋審分別實緩專由刑  
部定擬該衙門於朝審時僅與各衙門公同覆勘自應免其處分

所有片奏請嗣後刑部定擬秋審實緩會同都察院大理寺覈擬如有錯擬由部議處之處著毋庸議○諭袁甲三奏親督官軍偪攻賊圩立將臨淮關克復長淮一律蕩平乘勝進剿一摺我軍自攻取臨淮西面各圩後節節進偪本月十五日川北道苗沛霖帶勇渡淮添築五營並將臨鳳要路賊營一座乘勝奪獲總兵張得勝由東路進偪關下奪獲賊營二座十七日袁甲三親赴臨淮飛飭副都統穆騰阿等馬隊會合南岸兵勇進剿十八日總兵張得勝等約同水陸各軍齊力環攻該逆驚呼亂竄我兵偪入關內逆匪聞有奔逃衝出者均經兵勇追殺殲擒殆盡當將臨淮關克復其北岸各圩踞賊先經我軍挑築長濠圍困該逆見南岸賊敗均各喪膽我軍合力撲進將悍賊概行誅戮生擒首逆顧大瀧等九名就地正法辦理甚爲得手著袁甲三卽飭兵勇進攻鳳陽迅圖

克復毋畱餘孽其出力文武並前次聲明彙案保奏各員弁兵勇著袁甲三查明請獎候朕施恩○諭軍機大臣等臨淮關爲南北扼要地方既經官軍克復則餉路已通大兵即可由此進剿實爲皖省軍務一大轉機著袁甲三卽督飭諸軍進攻鳳陽府縣兩城迅圖克復另片奏存營馬隊不敷分撥等語德楞額所撥馬隊五百名前諭袁甲三於臨淮克復後卽行遣回見在張落刑尙踞定遠張濬伏匿鳳陽亟應乘機攻剿所有此項馬隊准其暫畱軍營惟賊蹤飄忽靡常設北路緊要不但將此項馬隊迅速撤回並須不分畛域添派步隊以固北路藩籬是爲至要將此由六百里各諭令知之○諭前因蕭啟江兵勇曾國藩並未調回湖北仍諭令駱秉章接濟兵餉由曾謝鍾飭赴慶遠一帶追剿石逆茲據駱秉章奏蕭啟江一軍已回抵湘潭距廣西慶遠府較遠自宜繞道赴

蜀與田興恕會合夾攻以保川省且兼顧黔粵著照所擬辦理至  
蕭啟江軍餉每月由湖南籌給一半將來入蜀後該撫擬由川省  
全數籌給近年川省籌解各省軍餉爲數已多此項餉糈恐未必  
能全行撥給仍著駱秉章按月籌解一半毋誤要需至該撫請飭  
曾國藩從長計議酌帶水陸各軍赴蜀等語見在四川省業已收  
復筠連等三縣敘郡亦已解圍情形較鬆况皖省軍務正當喫緊  
曾國藩見須統師東下以顧全局勢不能再令赴蜀著駱秉章仍  
飭蕭啟江會合田興恕一軍確探賊蹤迅速相機進剿務須殲擒  
巨逆毋令闖入川境將此由六百里諭令知之○以克復臨淮關  
欽差大臣袁甲三下部優敘副都統穆騰阿以都統用賞委參領  
克蒙阿頭品頂帶全福巴圖魯名號總兵官張得勝滕家勝提督  
銜餘加銜升敘有差○癸亥諭內閣慶端奏勦辦莆田匪徒將首

夥要犯擒獲分別正法一摺福建莆田大崙鄉爲盜賊淵藪疊次抗拒官兵經署興化府知府曾憲德等於本年九月十三日督兵進攻煙墩該匪負嵎拒敵守備田如松等拔旗而登斃匪多名當將賊窩十三座焚毀鄉民捆送著名匪犯鄭鍾陳全二名卽在軍前正法匪首潘楷自縛投首其大崙各鄉賊巢一律燬平燒斃賊匪四十餘名並按獲匪黨悉行正法辦理尙爲妥協所有出力各員准該督擇尤酌保數人以昭激勸○諭軍機大臣等據曹澍鍾奏見在廣西軍務情形日有起色請暫回川省經理母喪等語川省本完善之區石逆大股奔竄慶遠府屬之得勝鎮已逾黔界該逆自注意在川劉長佑等見攻柳州逼近慶遠沿途紳團截殺該逆勢必奔黔窺蜀著曹澍鍾督飭劉長佑等會合兜剿務將石逆殲除不得謂驅逐出境遂足了事如果石逆竄出粵界亦須跟蹤

追剿毋令闖入川省致滋蔓延見在藩司劉長佑等既帶兵出省  
臬司張凱嵩辦理通省團練會籌軍務正當喫緊之時該署撫所  
請暫回川省經理母喪之處著仍遵前旨俟廣西軍務稍平再行  
奏請簡員更代該署撫應俟派署有人方可交卸至抵川後果能  
會合官兵迎頭截剿以保完善之區更爲妥善將此由五百里諭  
令知之○諭曹澍鍾奏粵西軍餉支絀請飭湖南仍行接濟並催  
四川等省速撥協餉一摺廣西地方本屬地瘠民貧又經兵燹數  
年之後餉竭兵艱見在石達開大股逆匪屯聚慶遠將由思恩等  
境圖竄黔邊劉長佑蘇鳳文等軍因剿沿路土匪自雒容一帶轉  
戰前進軍糈刻不可緩劉長佑一軍前由駱秉章派赴粵西援剿  
所向有功糧餉均由湖南支給茲據奏稱截至十月底止尙有欠  
解銀二十餘萬兩已據駱秉章咨明白十一月起就近歸於西省



按日接支俟楚庫盈餘仍當酌解自係萬不得已惟粵省情形困乏已極前據四川委解銀五萬兩一時驟難趕到其部撥山西陝西協濟湖北月餉各劃十萬兩亦未有起解之期軍行月餉斷非本省力量所能接羅著駱秉章務再設法移緩就急仍將劉長佑及劉坤一各軍餉銀暫行照數按月撥解至四川山西陝西所有報解及奉撥粵西軍餉銀兩亦即趕緊籌撥趲解俾無困乏之虞是爲至要將此由五百里各諭令知之○以甘肅安西協副將李世忠備餉勦賊永廣本籍河南光州學額一名固始二名其部弁隨同勦守出力永廣安徽滁州來安霍邱學額各一名○甲子裕祭太廟○胡林翼奏楚軍征皖侍郎曾國藩駐紮宿松多隆阿鮑超唐訓方蔣凝學馬步四軍圍守太湖探聞逆首糾合粵匪大股上犯臣於十月二十八日自黃州移營至蘄州陳德園籌商各

路軍情布置稍定十二月初六日移營英山縣城南距黃州約二百餘里距羅田蘄水約各數十里控制潛霍規畫六舒可以捍蔽楚疆兼顧豫境查潛山縣屬之天堂雄據山中實爲舒桐英霍之總要臣先於九月密飭參將余際昌等奪此天險移營駐紮惟孤軍深入處賊所必爭之地更當密察機宜隨時策應庶保無虞報聞○乙丑 上御保和殿賜朝正外藩等宴○是月給直隸開州等三州縣被水災民口糧並緩徵額賦蠲緩江蘇海門等六十六廳州縣衛高郵等四十七州縣浙江海甯等六十八州縣衛暨杜瀆等四場河南鄭州等五十三州縣湖北沔陽等二十州縣被災地方新舊錢漕額賦展緩陝西府谷縣甘肅狄道等十六州縣暨沙泥州判所屬水旱霜雪雹災舊欠兵糧額賦伊犁新溝白陽溝南渠被旱田地額賦蠲免浙江衢州所屬被兵地方上年津租屯

餉○是歲朝鮮琉球入貢○會計天下民穀數直隸等省通共大小男婦二萬九千一百一十四萬八千九百四十三名口存倉米穀九百九十八萬七十四石八斗三合九勺